



宋本殘破及雷朽不可辨者以括弧別之
宋本錯字亦照改以存其真

水經第十六

漢 桑 欽 撰

後魏 酈道元 注

明 吳 瑄 校

穀水

甘水

漆水

滄水

沮水

穀水出弘農黽池縣南墦塚林穀陽谷

山海經曰傳山之西有林焉曰墦塚穀水出焉東

流注于洛其中多珉玉今穀水出于嶠東馬頭山

穀陽谷東北流歷黽池川本中鄉地也漢景帝三

年初徙萬戶爲因嶠鼃之池以目縣焉亦或謂之彭池故徐廣史記音義曰鼃或作彭穀水處也穀水又東逕秦趙二城南司馬彪續漢書曰赤眉從鼃池自利陽南欲赴宜陽者也世謂之俱利城者嘖曰昔秦趙之會各據一城秦王使趙王鼓瑟藺相如今秦王擊缶處也馮異又破赤眉於是川矣故光武璽書曰始雖垂翅回溪終能奮翼澗池可謂失之東隅收之桑榆矣穀水又東逕土嶠北所謂二嶠也穀水又東左會北溪溪水北出鼃池山東南流注于穀疑卽孔安國所謂澗水也穀水又

東逕新安縣故城南北夾流而西接嶠鼃昔項羽西入秦坑降卒二十萬於此國滅身亾宜矣穀水又東逕千秋亭南其亭累石爲垣世謂之城也潘岳西征賦曰亭有千秋之號子無七旬之期謂是亭也又東逕于雍谷溪回岫縈紆石路阻峽故亦有峽石之稱矣晉木歷側左與北川水合水有二源並導北山東南流合成一水自乾注巽入于穀穀水又東逕缺門山山阜之不接者里餘故得是名矣二壁爭高斗聳相亂西瞻雙阜右望始低穀水自門而東廣陽川注之水出廣陽北山東南流

注于穀南望微山雲峰相亂穀水又逕白超壘南
戴延之西征記云次至白超壘去函谷十五里築
壘當大道左右有山夾至相去百餘步從中出此
乃故關城非所謂白超壘也是壘在缺門東一十
五里壘側舊有塢故治宮所在魏晉之日引穀水
爲水治以經國用遺跡尚有穀水又東石默溪水
出微山東麓石默溪東北流入于穀穀水又東宋
水北流注于穀穀水又東逕魏將作大匠毋丘興
盛墓南二碑存焉儉父也管輅別傳曰輅嘗隨軍
西征過其墓而歎謂士友曰玄武藏頭青龍無足

白虎衝尸朱雀悲哭四危已備法應滅族果如其
言穀水又東逕函谷關南東北流皂澗水注之水
出新安縣東南流經毋丘興盛墓東又南逕函谷
關西關高峻峽路出屢郭漢元鼎三年樓船將軍
楊僕數有大功耻居關外請以家僮七百人築塞
徙關於新安卽此處也昔郭丹西入關感慨於其
下曰不乘駟馬高車終不出此關也去家十二年
果如志焉皂澗水又東流入于穀穀水又東北逕
函谷關城東右合桑爽之水山海經曰白石山西
五千里曰穀山其上多穀其下多桑爽之水出焉

世謂之紵麻澗北流注于穀山海經曰其中多碧
穀水又東澗水注之山海經曰婁涿山西四十里
曰白石之山澗水出焉北流注于穀自下通謂之
澗水爲穀水之兼稱焉故尚書曰伊洛瀍澗旣入
于河而無穀水之目是名亦通稱矣劉澄之云新
安有澗水源出北縣又有淵水未知其源余考諸
地記並無淵水但淵澗字相似時有字錯爲淵也
故闕駟地理志曰禹貢之淵水是以知傳寫書誤
字謬舛真證之不思所致耳旣無斯水何源之可
求乎穀水又東波水注之山海經曰瞻諸山西三

十里婁涿之山無草木多金玉波水出于其陰也
謂之百答水北流注于穀山海經曰其中多菀石
文石穀水又東少水注之山海經曰隗山西三十
里曰瞻諸之山其陽多金其陰多文石少水出于
其陰控引衆溪積以成川東流注于穀世謂之慈
澗也穀水又東俞隨之水注之山海經曰平蓬山
西十里隗山其陽多璵璠之玉俞隨之水出于其
陰北波注于穀世謂之孝水也潘岳西征賦曰澡
孝水以濯纓嘉美名之在茲是水在河南城西十
餘里故呂忱曰孝水在河南而戴延之言在函谷

關西劉澄之又云出擅山擅山在宜陽縣西在穀水南無南入之理考尋茲說當承緣生述征謬誌耳緣生從戎行旅征途訊訪既非舊土故無所究今川瀾北注澄映泥濘得言枯涸也皆爲䟽僻矣東北過穀城縣北

城西臨穀水故縣取名焉穀水又東逕穀城南不歷其北又東逕洛水枝流入焉今無水也

又東過河南縣北東南入于洛

河南城西北穀水之右有石磧磧南出爲死穀北出爲湖溝魏太和七年暴水流高三丈此地地下停

流以成湖渚造溝以通水東西十里決湖以注瀍水穀水又逕河南王城北所謂成周矣公羊曰成周者何東周也何休曰名爲成周者周道始成王所都也地理志曰河南河南縣故郊鄜地也京相璠曰郊山名鄜地邑也十年定鼎爲王之東都謂之新邑是爲王城其城東南名曰鼎門蓋九鼎所從入也故謂是地爲鼎中楚子伐陸渾之戎問鼎於此述征記曰穀洛二水本於王城東北合流所謂穀洛關也今城之東南缺千步世又謂之穀洛關處俱爲非也余按史傳周靈王之時穀洛二水

關毀王宮王將塌之太子晉諫王不聽遺堰三堤尚存左傳襄公二十五年齊人城邾穆叔如周賀韋昭曰洛水在王城南穀水在王城北東入于灑至靈王時穀水盛出於王城西而南流合於洛兩水相格有似於關而毀王城西南也穎客之著春秋條例言西城梁門枯水處世謂之死穀是也始知緣生行中造次又關經究故事與實違矣考王封周桓公於是爲西周及其孫惠公封少子於鞏爲東周故有東西之名矣秦滅周以爲三川郡項羽封申陽爲河南王漢以爲河南郡王莽又名之

曰保忠信鄉光武都洛陽以爲尹尹正也所以董正京畿率先百郡也穀水又東流逕乾祭門北子朝之亂晉所開也東至千金塌河南十二里境薄曰河南縣城東十五里有千金塌洛陽記曰千金塌舊堰穀水魏時更修此堰謂之千金塌積石爲塌而開溝渠五所謂之五龍渠渠上立塌塌之東首立一石人石人腹上刻勒云太和五年二月八日庚戌造築此塌更開溝渠此水衡渠上其水助其堅也必經年歷世是故部立石人以記之云爾蓋魏文帝修王張故績也塌是郡水使者陳協所

造也語林曰陳協數進阮步兵酒後晉文王欲修
九龍堰阮舉協文王用之掘地得古承水銅龍六
枚堰遂成水歷竭東注謂之千金渠逮于晉世大
水暴注溝瀆泄壞又廣功焉石人東脇下文云太
始七年六月二十三日大水并瀑出常流上三丈
蕩壞二竭五龍泄水南注瀉下加歲久漱齧每澇
卽壞歷載消棄大功今故爲令遏更於西開泄名
曰代龍渠地形正平誠得爲泄至理千金不與水
勢激爭無緣當壞由其卑下水得輪上漱齧故也
今增高千金於舊一丈四尺五龍自然必歷世無

患若五龍歲久復壞可轉於西更開二竭二渠合
用二十三萬五千六百九十八功以其年十月二
十三日起作功重人少到八年四月二十日畢代
龍渠卽九龍渠也後張方入洛破千金竭公私賴
之水積年渠竭頽毀石砌殆盡遺基見存朝廷太
和中修復故竭按千金竭石人西脇下文云若溝
渠久疏疎引水者當於河南城北石磧西更開渠
北出使首孤丘故溝東下因故易就磧堅便時事
業已訖然後見之加邊方多事人力苦少又渠竭
新成未患於水是以不敢預修通之若於後當復

興功者宜就西磧故書之於石以遺後賢矣雖石磧淪敗故跡可憑准之於文北引渠東合舊瀆舊瀆又東晉惠帝造石渠於水上按橋西門之南頰文稱晉元康二年十一月二十日改治石巷水門除堅枋更爲函枋立作覆枋屋前後辟級續石障使南北入岸築治漱處破石以爲殺矣到三年三月十五日畢記并紀列門廣長深淺于左右巷東西長七尺南北龍尾廣十二丈巷瀆口高三丈謂之罽門橋又潘岳西征賦曰秣馬罽門卽此處也穀水又東又結石梁跨水制城西梁也穀水又東

左會金谷水水出大白原東南流歷金谷謂之金水東南流逕晉衛尉卿石崇之故居也石季倫金谷詩集敘曰余以元康七年從太僕出爲征虜將軍有別廬在河南界金谷澗中有清泉茂樹衆果竹栢藥草蔽翳渭水又東南得歷泉水北歷泉溪東南流注于渭渭水又東南出橋西亭西又南得籍水口水出西山百澗聲流惣成一川東歷當亭川卽當亭縣治也左則當亭水注之右則曾席水又東與大弁川水出西山二源合注東歷大弁川東南流注于籍水籍水又東南流與竹嶺水合水

出南山竹嶺二源同瀉東北入籍水籍水又次東北入上邽縣左佩五水東會占溪水次東有大魯溪水次東得小魯谷水次東有楊反谷水咸自北山注離注籍水籍水右帶五水竹嶺東得亂石溪水次東得木門谷水次東得羅城溪水次東得山谷水皆導源南山北流入籍水籍水又東黃瓜水注之其水發源黃瓜西谷東流逕黃瓜縣北又東清溪白水左右夾注又東北大旱谷水南出旱溪歷澗北流泉溪委漾同注黃瓜水黃瓜水又東北歷赤谷咸歸于籍籍水又東得毛泉谷水又東逕

上邽城南得覈泉水並出南山北流注于籍籍水卽洋水也北西北角築之謂之金墉城魏文帝起層樓於東北隅晉宮閣名曰金墉有崇天堂卽此地上架水爲榭故曰樓矣皇居創徙宮極未就止蹕於此構宵榭於故臺所謂臺以停停也南曰乾光門夾建兩觀觀下列朱桁於塹以爲御路東曰含春門北有退門城上西面列觀五十步一睥睨屋臺置一鍾以和漏鼓函北連廡蔭墉北廣榭炎夏之日高視常以避暑爲淥水池一所在金墉者也穀水逕洛陽小城北因阿舊城憑結金墉故尚

地也永嘉亂結以爲壘號曰洛陽壘故洛陽記曰
陵雲臺西有金市金市北對洛陽壘者也又東歷
大夏門下故夏門也陸機與弟書云門有三層高
百尺魏明帝造門內東側際城有魏文帝所起景
陽山餘基尚存孫盛魏春秋曰黃初元年文帝愈
崇宮殿雕飾觀閣取白石英及紫石英及五色大
石於太行穀城之山起景陽山於芳林園樹松竹
草木捕禽獸以充其中于時百役繁興帝躬自掘
土率羣臣三公已下莫不展力山之東舊有九江
陸機洛陽記曰九江直作負水水中作負壇三破

之夾水得相逕通賦曰濯龍芳林九谷八溪芙蓉
覆水秋蘭被崖今也山則塊阜獨立江無復髮髯
矣渠水又東枝分南入華林園歷䟽圃南圃中有
古玉井井悉以珉玉爲之以錙石爲口王作精密
猶不變古璨焉如新又瑤華宮南歷景陽山北山
在都亭堂上結方湖湖中起御坐石也御坐前建
蓬萊山曲池接筵飛沼拂席南面射侯夾席武峙
背山堂上則石路崎嶇巖嶂峻嶮雲臺風觀纓巒
帶阜遊觀者升降耶閣出入虹陛望之狀鳧沒鸞
舉矣其中引水飛翠傾瀾瀑布或枉渚聲溜潺潺

不斷竹栢蔭於層石繡薄叢於泉側微颺暫拂則
芳溢於六空入爲神居矣其水東生天淵池池中
有魏文帝九花叢殿基悉是洛中故碑累之今造
釣臺於其上池南置魏文帝茅茨堂前有茅茨碑
是黃初中所立也其水自天淵池東出華林園逕
聽訟觀南故平望觀也魏明帝常言獄天下之命
也每斷大獄恒幸觀聽之以太和三年更從今名
觀西北接華林隸薄昔劉楨磨石處也文士傳曰
文帝之在東宮也宴諸文學酒酣命甄后拜坐坐
者成伏唯劉楨平仰觀之太祖以爲不敬送徒隸

薄後太祖乘步牽車乘城降關薄作諸徒感敬而
楨撫坐磨石不動太祖曰此非劉楨也石如何性
楨曰石出荆山玄巖之下外炳五色之章內秉賢
貞之志雕之不增文磨之不加瑩稟氣真正稟性
自然太祖曰名豈虛哉復爲文學池水又東流于
洛陽縣之南池池卽故狄泉也南北百一十步東
西七十步皇甫謐曰悼王葬景王於翟泉今洛陽
太倉中大夫冢是也春秋定公元年晉魏獻子合諸
侯之大夫于翟泉始盟城周班固服虔皇甫謐咸
言翟泉在洛陽東北周之墓地今按周威烈王葬

洛陽城內東北隅景王塚在洛陽太倉中翟泉在兩塚之間側廣墓門道東建春門路北路卽東宮街也於洛陽爲東北後秦封呂不韋爲洛陽十萬戶侯大其城并得景王冢矣是其墓地也及晉永嘉元年洛陽東北步廣里地陷有二鵝出蒼色者飛翔冲天白色者止焉陳留孝廉董養曰步廣周之狄泉盟會之地今色蒼胡象矣其可盡言乎後五年劉曜王彌入洛帝居平陽陸機洛記曰步廣里在洛陽城內宮東是狄泉所在不得於太倉西南也京相璠與裴司空彥季脩晉輿地圖作春秋

地名亦言今太倉西南池水名狄泉又曰舊說言狄泉本自在洛陽北長弘成周乃繞之杜預因其一證必是狄泉而卽實非也後遂爲東宮池晉中州記曰惠帝爲太子出聞蝦蟇聲問人爲是官蝦蟇私蝦蟇侍臣賈胤對曰在官地爲官蝦蟇在私地爲私蝦蟇今曰若官蝦蟇可給廩東先是有讖云蝦蟇當貴昔晉朝收愍懷太子於後池卽是池也其一水自大夏門東逕宣武觀憑城結構不更層墉左右夾列步廊參差翼跂南望天淵池北矚宣武場竹林七賢論曰王戎幼而清秀魏明帝於宣

武場上爲欄苞虎阱使力士袒裊迭與之搏縱百
姓觀之戎年七歲亦往觀焉虎承間薄欄而吼其
聲震地觀者無不辟易顛仆戎亭然不動帝於門
上見之使問姓名而異之場西故賈充宅地穀水
又東逕廣莫門北漢之穀門也北對芒阜連嶺脩
亘苞惣衆山始自洛口西踰平陰悉芒隴也魏志
曰明帝欲平北芒令登臺見孟津侍中辛毗諫曰
若九河溢涌洪水爲害丘陵皆夷何以禦之帝乃
止穀水又東出屋南逕建春門石橋下卽上東門
也阮嗣宗詠懷詩曰步出上東門者也一曰上升

門晉曰建陽門百官志曰洛陽十一門候一人六
百石東觀漢記曰鄧暉爲上東門候光武嘗出夜
還詔開門欲入暉不內上令從門間識面暉曰火
明遼遠遂拒不開由是上益重之亦袁本初挂節
處也橋首建兩石柱橋之右柱銘云陽嘉四年乙
酉壬申詔書以成下漕渠東通河濟南引江淮方
貢委輸所由而至使中謁者魏郡清淵馬憲監作
石橋梁柱敦敕工匠盡要妙之巧攢立重石累高
周距橋工路博流通萬里云云河南尹邳崇隗承
渤海重合雙福水曹掾中牟任防史王蔭史趙興

將作吏睢陽申翎道橋掾成羣卑國洛陽令江雙
丞平陽降監掾王騰之主石作左北平山仲三月
起作八月畢成其水依柱文自樂里道屈而東出
陽渠昔陸機爲成都王穎入洛敗此而返水南卽
馬市也舊洛陽有三市斯其一也稽叔夜爲司馬
昭所害處也北則白社故里也昔孫子荆會董威
輦於白社謂此矣以同載爲榮故有威輦卣又東
逕馬市石橋橋南有二石柱並無文刻也漢司空
漁陽王梁之爲河南也將引穀水以漑京都渠成
而水不流故以坐免後張純堰洛而通漕洛中公

私懷瞻是渠今引穀水蓋純之創也按陸機洛陽記
劉澄之永初記言城之西面有塲渠周公制之也
昔周遷殷氏于洛邑城隍褊狹卑陋之所耳晉故
城成周以居敬王秦又廣之以封不韋以是推之
非專周公可知矣亦謂之九曲瀆故河南十二縣
簿云九曲瀆在河南鞏縣西西至洛陽又按傳暢
晉書云都水使者陳良鑿運渠從洛口入注九曲
至東陽門是以阮嗣宗詠懷詩所謂朝出上東門
遙望首陽基又言遙遙九曲間襄徊欲何之者也
陽渠南水南暨閭闔門漢之上西門者也漢官記

曰上西門所以不純白者漢家厄於戍故以丹鏤之太和遷都徙門南側其水北乘高渠枝分上下歷故石橋東入城逕望先寺中有碑碑側法子丹碑作龍矩勢於今作則佳方古猶劣渠水又東歷故金市南直千秋門右宮門也又枝流入石逗伏流注靈芝九龍池魏太和中皇都遷洛陽經構宮極脩理街渠務窮隱發石甌之嘗無毀壞又石工細密非今起所擬亦竒爲精至也遂因用之其一水自千秋門南流逕神虎門下東對雲龍門二水衡挾之上皆列龍雲風虎之狀以火齊薄之及其

晨光初起夕景斜輝霜文翠照陸離眩目又南逕通門掖門西又南流東轉逕閭闔門南案禮王有五門謂臯門庫門雉門應門路門路門一曰畢門亦曰虎門也魏明帝上法太極於洛陽南宮起太極殿于漢崇德殿之故處改雉門爲閭闔門昔在漢世洛陽宮殿門題多是大篆言是蔡邕諸子自董卓焚宮殿魏太祖平荊州漢吏部尚書安定梁孟皇蓋師宜官八分體求以贖死太祖善其法常仰繫帳中愛翫之以爲勝宜官北宮榜題咸是鵠筆南宮旣建明帝令侍中京兆韋誕以古篆書之

皇都遷洛始令中書舍人沈舍馨以隸書書之景
明正始之年又敕符節令江式以大篆易之今諸
桁榜題皆是式書周官太宰以正月懸治法於象
魏廣雅曰闕謂之象魏風俗通曰魯昭公設兩觀
於門是謂之闕從門厥聲爾雅曰觀謂之闕說文
曰闕門觀也漢官典職曰偃師去洛四十五里望
朱雀闕其上鬱然與天連是明峻極矣洛陽故宮
名有朱雀闕白虎闕蒼龍闕北闕南宮闕也東觀
漢記曰更始發洛陽李松奉引車馬奔觸北闕鐵
柱門三馬皆死卽斯闕也白虎通曰門必有闕者

何闕者所以飾門別尊卑也今閭闔門外夾建巨
闕以應天宿雖不如禮猶象而魏之上加復思以
易觀矣廣雅曰復思謂之屏釋名曰屏自障屏也
李思在門外李復也臣將入諸事於此復重思之
也漢末兵起壞園陵李思曰無使民復思漢也故
鹽鐵論曰垣闕李思言樹屏隅角所架也賴客又
曰闕者上有所失下得書之於闕所以求論譽於
人故謂之闕矣今闕前水南道右置登聞鼓以納
諫也昔黃帝立明臺之議堯有衢室之問舜有告
善之旌禹有立鼓之訊湯有總街之誑武王有靈

臺之復晉所以廣設過誤之備也渠水又枝分夾路南逕出太尉司徒兩坊間謂之銅駝街舊魏明帝置銅駝諸轅於閭闔南街陸機云駝高九尺觀出太尉坊者也水西有永寧寺熙平中始創也作九層浮圖浮圖下基方一十四丈自金露拌下至地四十九丈取法代都七級而又高廣之雖二京之盛五都之富利刹靈圖未有若斯之構按釋法顯行傳西國有爵離浮圖其高與此相狀東都西域俱爲莊妙矣其地是曹爽故宅經始之日於寺院西南隅得爽窟室下入土可丈許地壁悉累方

石砌之石作細密都無所毀其石悉入法用自非曹爽庸匠亦難復制此桓氏有言曹子丹生此勝犢信矣渠左是魏晉故廟地今悉民居無復遺墉也渠水又西歷廟社之間南注南渠廟社各以物色辯方周禮廟及路寢皆如明堂而有燕寢焉唯祧廟別無後代通爲一廟列正室於下無復燕寢之制禮天子建國左廟右社以石爲主祭則希冕今多王公攝事王者不親拜焉咸寧元年洛陽大風帝社樹折青氣屬天元王東渡魏社代昌矣渠水自銅駝街東逕司馬門南魏明帝始築闕崩壓

殺數百人遂不復築故無闕門南屏中舊有置銅
翁仲處金狄旣淪故處亦禡唯壞石存焉自此南
直宣陽門經緯通達皆列馳道往來之禁一同兩
漢曹子建嘗行御街犯門禁以此見薄渠水又東
逕杜元凱所謂狄泉北今無水坎方九丈六尺深
二丈餘似是人工而不類於泉陂是驗非之一證
也又皇甫謐帝王世紀云王室定遂徙居成周小
不受王都故壞翟泉而廣之泉源旣塞明無故處
是驗非之二證也杜預言翟泉在太倉西南旣言
西南於雒陽不得爲東北是驗非之三證也稽之

地說事幾明矣不得爲狄泉也渠水歷司空府前
逕太倉南東出陽門石橋下注陽渠穀水自閭闔
而南逕土山東水西三里有坂坂上有土山漢大
將軍梁冀所成築土爲山植林成苑張璠漢記曰
山多峭坂以象二嶠積金玉採捕禽獸以充其中
有人殺死兔者迭相尋逐死者十三人南出逕西
陽門舊漢氏之西明門也亦曰雍門矣舊門在南
太和中以故門郭出故徙是門東對東陽門穀水
又南逕白馬寺東是漢明帝夢見大人金色項佩
白光以問羣臣或對曰西方有神名曰佛形如陸

下所夢得無是乎於是發使天竺寫致經像始以
榆欂盛經白馬負圖表之中夏故以白馬爲寺名
此榆欂後移在城內愍懷太子浮圖中近世復遷
此寺然金光流照法輪東轉創自此矣穀水又南
逕平樂觀東李尤平樂觀賦曰乃設平樂之顯觀
章祕偉之奇珍華嶠漢書曰靈帝於平樂觀下起
大壇上建十二重五采華蓋高十丈壇東北爲小
壇復建九重華蓋高九丈列奇兵騎士數萬人天
子住大蓋下禮畢天子躬櫬甲稱無上將軍行陣
三匝而還設祕戲以示遠人故東京賦曰苑西則

有平樂都場示遠之觀龍雀蟠蜿天馬半漢應劭
曰飛廉神禽能致風氣古人以良金鑄其象明帝
永平五年長安迎取飛廉并銅馬置上西門外平
樂觀今於上西門外無他基觀惟西明門外獨有
此臺巍然廣秀疑卽平樂觀也又言皇女雅殤埋
於臺側故復名之曰皇女臺晉灼曰飛廉鹿身頭
如雀有角而蛇尾豹文董卓銷爲金用銅馬徙於
建始殿東階下胡軍喪亂此象遂淪穀水又南逕
西門門故廣陽門也門左枝渠東派入城逕木社
前又東逕太廟南又東於清陽門右下注陽渠穀

水又南東屈逕津陽門南故津陽門也昔洛水泛
汎漂落害者衆津陽城門校將築以遏水諫議大夫
陳宣止之曰王遵臣也水絕其足朝廷中興必不
入矣水乃造門而退穀水又東逕宣陽門南故苑
門也皇都遷洛移置於此對闔闔門南直洛水浮
桁故東京賦曰泝洛背河左伊右瀍者也夫洛陽
考之中土下惟洛食寔爲神也門左卽洛陽池處
也池東舊平城門所在矣今塞北對南陽南宮故
蔡邕曰平城門正陽之門與宮連屬郊祀法駕所
由從出門之最尊者洛陽諸宮名曰南宮有謏臺

臨照臺東京賦曰其南則有謏門曲榭依阻城洫
注云謏門水室門也阻依洫城下池也皆屈曲耶
行依城池爲道故說文曰隍城池也有水曰池無
水曰隍矣謏門卽宣陽門也門內有宣陽水室周
禮有冰人日在北陸而藏之西陸朝覲而出之冰
室舊在宣陽門內故得是名門旣擁塞水室又罷
穀水又逕靈臺北望雲物也漢光武所築高六丈
方二十步世祖嘗宴於此臺得廷鼠於臺上亦諫
議大夫第五子陵之所居倫少子也以清正洛陽
無主人鄉里無田宅寄止靈臺或十日不炊司隸

校尉南陽左雄尚書廬江朱孟興等故孝廉功曹
各致禮餉並辭不受永建中卒穀水又東逕平昌
門南故平門也又逕明堂北漢光武中元元年立
尋其基構上圓下方九室重隅十二堂蔡邕月令
章句同之故引水於其下爲壁雍也穀水又東逕
開陽門南晉宮閣名曰故建陽門也漢官曰開陽
門始成未有名宿昔有一柱來在樓上琅琊開陽
縣上言南城門一柱飛去光武皇帝使來識視良
是遂堅傳之刻記年月日以名焉湯仲弓嘗爲門
候上微行夜還湯閉門不內朝廷嘉之又東逕國

子太學石經北周禮有國學教成均之法學記曰
古者家有塾黨有庠遂有序國有學亦有虞氏之
上庠下庠夏后氏之東序西序殷人之左學周人
之東膠虞庠王制云養國老於上庠養庶老於下
庠故有太學小學教國之子弟焉謂之國子漢魏
以來置太學於國子堂東漢靈帝光和六年刻石
鏤碑載五經立於太學講堂前悉在東側蔡邕以
嘉平四年與五官中郎將堂谿典光祿大夫彈議
郎張訓韓詵太史令單颺等奏求正定六經文字
靈帝許之邕乃自書丹於碑使工鐫刻立於太學

門外於是後儒晚學咸取正焉及碑始立其觀視
及筆寫者車乘日千餘兩填塞街陌矣今碑上悉
銘刻蔡邕等名魏正始中又立古篆隸三字石經
古文出於黃帝之世倉頡本鳥跡爲字取其孳乳
相生故文字有六義焉自秦用篆書焚燒先典古
文絕矣魯恭王得孔子宅書不知有古文謂之科
斗書蓋因科斗之名遂效其形耳言大篆出於周
宣之時史籀創著平王東遷文字乖錯秦之李斯
及胡毋敬有改籀書謂之小篆故有大篆小篆焉
然許氏字說專釋於篆而不本古文言古隸之書

刻下似是務字半頭
誤非者字也

起於秦代而篆字文繁無會劇者故用隸人之省
謂之隸書或云卽程邈於雲陽增損者是言隸者
篆捷也孫暢之嘗見青州刺史傳弘什說臨淄人
發古塚得銅棺前和外隱爲隸字言齊太公世孫
胡公之棺也唯二字是古隸特同今書證知隸特自出
古非始於秦魏初傳古文出邯鄲淳石經古文轉
失淳法樹之於堂西石長八尺廣四尺列石於其
下碑石四十八枚廣三十丈魏文帝又刊典論六
碑附于其次陸機言太學贊別一碑在講堂西下
列石龜碑載蔡邕韓說高堂谿等名太學弟子贊

復一碑在外門中今二碑並無石經東有一碑是漢順帝陽嘉八年立碑文云建武二十七年造太學年積毀壞永建六年九月詔書修太學刻石記年用作工徒十一萬二千人陽嘉九年八月作畢碑南面刻頌表裏鏤字猶存不破漢石經北有晉辟雍行禮碑是太始二年立其碑中折但世代不同物不停故石經淪缺存半毀幾駕言永久諒用憮焉考古有三雍之文今靈臺太學並無辟雍處晉永嘉中王彌劉曜入洛焚毀二學尚髣髴前基矣穀水於城東南隅枝分北注逕清陽門東故清

明門也亦曰稅門也亦曰芒門又北逕東陽門東故中東門也又北逕故太倉西洛陽地記曰大城東有太倉倉下運船常有千計卽是處也又北入洛陽溝穀水又東左迤爲池又東右出爲方湖東西一百九十步南北七十步故水衡署之所在也穀水又東南轉屈而東注謂之阮曲云阮嗣宗之故居也穀水又東注鴻池陂百官志曰鴻池池名也在洛陽東二十里丞一人二百石池東西千步南北千一百步四周有塘池中又有東西橫塘水溜逕通故李尤鴻池陂銘曰鴻澤之陂聖王所規

開水東注出自城池也其水又東左合七里澗晉
 後略曰成都王使吳人陸機為前鋒都督伐京師
 輕進為治軍所處大敗於鹿苑人相登躡歿於塹
 中及七里澗澗為之滿即是澗也澗有石梁即旅
 人橋也昔孫登不欲久居洛陽知楊氏榮不保終
 思欲遽跡林鄉隱淪妄歿楊駿埋之於此橋之東
 駿後尋亾矣搜神記曰太康末京洛始為折楊之
 歌有兵革辛苦之辭駿後被誅太后幽歿折楊為
 之應也楊是數橋皆累石為之亦高壯矣制作甚
 佳雖以時往損功而不廢行旅朱超石與兄書云

既楊字

楊字既在也字下

橋去洛陽宮六七里悉用大石下負以通水可受
 大舫過也奇制作題其上云太康三年十一月初
 就功日用七萬五千人至四月末止此橋經破落
 復更修補今無復文字陽渠水又東流逕漢廣野
 君酈食其廟南廟在北山上成公綏所謂偃師西
 山也山上舊基尚存廟宇東面門有兩石人對倚
 北石人胸前銘云門亭長石人西有二石闕雖經
 頽毀猶高丈餘闕西即廟故基也基前有碑文字
 剝缺不復可識子安仰澄芬於萬古讚清徽於廟
 像文字厥集矣陽渠又東逕亳殷南昔盤庚所遷

改商曰殷此始也班固曰尸鄉故殷湯所都者也
故亦曰湯亭薛瓚漢書注皇甫謐帝王世紀並以
爲非以爲帝嚳都矣晉太康地理記並言田橫歿
於是亭故改曰尸鄉非也余按司馬彪郡國志以
爲春秋之尸氏也其澤野負原夾郭多墳壠焉
陸士衡會王輔嗣處也袁氏王陸詩敘機初入洛
次河南之偃師時忽結陰望道左右民居者因往
退宿見一少年姿神端遠與機言玄機服其能而
無以酬折前至一辯文機題緯古今綜檢名實此
少年不甚欣解將曉去稅駕逆旅嫗曰君何宿而

來自東數十里無村落止有山陽王冢墓機乃怪
悵還睇昨路空野昏霾雲攢蔽日知所過者審王
弼也此山卽祝雞翁之故居也搜神曰雞翁者洛
陽人也居尸鄉北山下養雞百年餘雞至千餘頭
皆有名字欲取呼之名則種別而至後之吳山莫
知所去矣穀水又東逕偃師城南皇甫謐曰帝嚳
作都於亳偃師是也王莽之所謂師氏者也穀水
又東流注于洛水矣

甘水出弘農宜陽縣鹿蹄山

山在河南陸渾縣故城西北俗謂之縱山水之所

導發于山曲之中故世人目其所爲甘棠焉
東北至河南縣南北入洛

甘水發源東北流北屈逕一故城東在非山上世
謂之石城也京相璠曰或云甘水西山上夢汁而
平有故甘城在河南城西二十五里指謂是城也
余按甘水東一十許里洛城南有故甘城焉北對
河南故城世謂之鑿洛城鑿甘聲相近卽故甘城
也爲王子帶之故邑矣是以昭叔有甘公之稱焉
甘水又與非山水會水出非山東谷東流入于甘
水甘水又於河南城西北入洛經言縣南非也故

京相璠曰今河南河南縣西有甘水北入洛斯得
之矣

漆水出扶風杜陽縣俞山東北入于渭

山海經曰踰次之山漆水出焉北流注于渭蓋自
北而南矣尚書禹貢太史公禹本紀云導渭水東
北至涇又東逕漆沮入于河孔安國曰漆沮一名
矣亦曰洛水也出馮翊北周太王去邠度渠踰梁
山止岐下故詩云民之初生自土沮漆又曰率西
水滸至於岐下是符禹貢本紀之說許慎說文稱
渠水出右扶風杜陵縣岐山東入渭從水渠聲又

云一曰漆城池也潘岳關中記曰關中有涇渭灞
澇鄠鄠漆沮之水鄠鄠漆沮四水在長安西南灞
縣皆注鄠鄠水北注渭開山圖曰麗山西北有温
地温地西南八十里岐川在杜陵埤長安西有渠
謂之柒渠班固地理志云漆水出漆縣西闕駟十
三州志又云漆水出漆縣西北岐山東入渭今有
水出杜陽縣岐山北柒溪謂之柒渠西南流注岐
水但川土奇異今說互出考之經史各有所據識
淺見浮無以辯之矣

澇水出京兆藍田谷北入于灞

地理志曰澇水出南陵縣之藍田谷西北流與一
水合水出西南莽谷東北流注澇水澇水又北歷
藍田川北流注于灞水地理志曰澇水北至灞陵
入灞水

沮水出北地直路縣東過馮翊殺羽縣北東入于洛
地理志曰沮出畿縣西東入洛今水自直路縣東
南逕樵石山東南流歷檀臺川俗謂之檀臺水屈
而夾山西流又西南逕宜君川世又謂之宜君水
又得黃嶽水口水西北出雲陽縣石門山黃嶽谷
東南流注宜君水又東南流逕殺羽縣故城西縣

以漢景帝二年置其水南合銅官水水出東北而西南逕銅官川謂之銅官水又西南流逕殺初縣東西南流逕其城南原下而西南注宜君水宜君水又南出土門山西又謂之沮水又東南歷土門南原下東逕懷德城南城在北原上又東逕漢太上皇陵北陵在南原上沮水東注鄭渠昔韓欲令秦無東伐使水工鄭國間秦鑿涇引水謂之鄭渠渠首上承涇水於中山西瓠口所謂瓠中也爾雅以爲周焦護矣渠並北山東注洛三百餘里欲以溉田中作覺欲殺鄭國曰始臣爲間然渠成亦秦

之利卒使就渠渠成而用注填闕之水溉澤鹵四萬餘畝皆畝一鍾關中沃野無復凶年秦以富強卒并諸侯命曰鄭渠渠瀆東逕宜秋城北又東逕中山南河渠書曰鑿涇水自中山而封禪書漢武帝獲寶鼎於汾陰將薦之甘泉鼎至中山氤氳有黃雲蓋焉徐廣史記音義曰關中有中山非冀州者也指證此山俗謂之仲山非也鄭渠又東逕捨車宮紀治谷水鄭渠故瀆又東逕嶺嶻山南池陽縣故城北又東絕清水又東逕北原下濁水注焉自濁水以上無濁水上承雲陽縣東大黑泉東

南流謂之濁谷水又東南出原注鄭渠又東歷原
逕曲梁城北又東逕太上陵南原下北屈逕原東
與沮水合分爲二水一水東南出即濁水也至白
渠與澤泉合俗謂之柒水又謂之爲柒沮水絕白
渠東逕萬年縣故城北爲櫟陽渠城即櫟陽宮也
漢高帝葬皇考於是縣起墳陵署邑號改曰萬年
也地理志曰馮翊萬年縣高帝置王莽曰異赤也
故徐廣史記音義曰櫟陽今萬年矣闕駟曰縣西
有涇渭北有小河渭此水也其水又南屈更名石
川水又西南逕郭猿城西與白渠枝渠合又南入

于渭水也其一水東出即沮水也東與澤泉合水
出沮東澤中與沮水隔原相去十五里俗謂是水
爲渠水也東流逕薄昭墓南塚在北原上又逕懷
德城北東南注鄭渠合沮水又自沮直絕注濁水
至白渠合焉故濁水得柒沮之名也沮循鄭渠東
逕當道城南城在頰陽縣故城南頰陽宮也秦厲公置
城北有頰山山有漢武帝殿以石架之縣在山南
故曰頰陽也應劭曰縣在頰水之陽今縣之左右
無水以應之所可當者惟鄭渠與沮水又東逕蓮
芍縣故城北十三州志曰縣以草受名也沮水又

東逕漢光武故城北又東逕粟邑縣故城北莽更名粟城也後漢封騎都尉耿夔爲侯國其水又東北流注于洛水也

水經第十六

丙辰三月十七日校

水經第十七

漢 桑 欽 撰

後魏 酈道元 注

明 吳 瑄 校

渭水上

渭水出隴西首陽縣渭谷亭南鳥鼠山

渭水出首陽縣首陽山渭首亭南谷山在鳥鼠山

西北此縣有高城嶺嶺上有城號渭源城渭水出

焉三川合注東北流逕首陽縣西與別源合水出

南鳥鼠山渭水出谷尚書禹貢所謂渭出鳥鼠者

下字微破然亦似
過字

也牠說曰鳥鼠山同穴之枝幹也謂水出其中東
北過過同穴枝間既言其過明非一水也又東北
流而會于姝源也渭水東南流逕首陽縣南右得
封溪水次南得廣相溪水次東得共谷水左則天
馬溪水次南則伯陽谷水並參差翼注亂流東南
出矣

又北過襄武縣北

廣陽水出西山二源合注成一川東北流注于渭
渭水又東南逕襄武縣東北荆頭川水入焉水出
襄武西南鳥鼠山荆谷東北逕襄武縣故城北王

所字尚可辨

莽更名相桓漢護羌校尉温序行部為隗囂部將
荀宇所拘銜鬚自刎處也其水東北流注于渭渭水
常若東南不東北也又東泉水注之水出西南雀
富谷東北逕襄武縣南東北流入于渭魏志稱咸
熙二年襄武上言大人見身長三丈餘跡長三尺
一寸白髮著黃單衣巾拄杖呼民王始語云今當
太平十二月天祿永終曆數在晉遂遷魏而事晉
又東過獮道縣南

右則岑溪水次則同水俱左則過水右注之源水
東南逕獮道故城西昔秦孝公西斬戎之獮王應

劭曰獮戎邑也漢靈帝五年別爲南安郡赤亭水出東山赤谷西流逕城北南入渭水渭水又逕城南得粟水水出西南安都谷東北流注于渭渭水又東新興川水出西南鳥鼠山二源合舍東北流與彰川合水出西南溪下東北至彰縣南本屬道故候尉治後漢縣之永元元年帝封耿秉爲侯國也萬年川水出南山東北流注之又東北注新興川又東北逕新興縣北晉書地道記南安之屬縣也其水又東北與南川水合出西南山下東北合北水又東北注于渭水渭水又東逕武城縣西武

城川水入焉津源所道出鹿部西山兩源合注東北流逕鹿都南亦謂之鹿部水又東北昌丘水出西南丘下東北注武城水亂流東北注渭水渭水又東入武陽川又有關城川水出南安城谷水出北丘川參差注渭水渭水又東與落門西山東流三府谷水注之三川統一東北流注于渭水有落門聚昔馮異攻落門未拔而薨建武十年來歙又攻之擒隗囂子純隴右平渭水自落門東至黑水峽左右六水夾注左則武陽溪水東門得土門谷水俱出北山南流入渭左則有溫谷次東有故城

溪水次東有閭里溪水亦名習溪水次東有黑水
並出南山北流入渭水又東出黑水歷冀川
又東過冀縣北

渭水自黑水峽至崆峒南北一十水注之北則温
谷水注之其水道平襄縣南山温溪東北流逕平
襄縣南城故襄戎邑也王莽之謂平襄縣矣其水
東南流歷三堆南東流南東流而南屈入黃槐川梗津
渠冬則輟流春夏承盛則通川注渭次則牛谷水
南入渭水南有長塹谷水次東有安蒲溪水次東
有衣谷水並南出朱圉山山在梧中聚有石鼓不

擊自鳴鳴則兵起漢成帝鴻嘉三年天水冀南山
有大石自鳴聲隱隱如雷有頃止聞于平襄二百
四十里野雞皆鳴石長丈三尺廣厚略等齋燧脇
去地百餘丈民俗名曰石鼓石鼓鳴則有兵是歲
廣漢黜子攻歾囚盜庫兵略吏民衣繡衣自號爲
仙君黨與漫廣明年冬伏誅自歸者二千餘人信
而有徵其水北逕冀縣城北秦武公十年伐冀戎
縣之故天水郡治王莽更名鎮戎縣曰冀治漢明
帝永平十七年改曰漢陽郡城卽隗囂稱西伯所
居也後馬超之圍冀也涼州別駕閻伯儉潛出水

中將告急夏侯淵爲超所擒令告城無救伯儉曰
大軍方至咸稱萬歲超怒數之伯儉曰卿欲令長
者出不義之言乎遂殺之渭水又東合冀水水出
冀谷次東濁谷水次東有當里溪水次東有託里
水次東有渠谷水次東有黃土川水俱出南山北
逕冀城東而北流于渭渭水又東出峯峽入新陽
川逕新陽下城南溪谷赤蒿二水並出南山東北
入渭水渭水又東與新陽岨水合卽隴水也東北
出隴山其水西流隴右逕瓦亭南隗躡聞略陽陷
使牛邯守瓦亭卽此亭也其水亦出隴山東南流

歷瓦亭北又西南合爲一水謂之瓦亭川西南流
逕清賓溪北又西南與黑水合水出黑城北西南
逕黑城西西南流莫吾南川水注之水東北出隴
垂西南流歷黑城南注黑水黑水西南出懸鏡峽
又西南入瓦亭川又有澁水自西東會世謂之鹿
角口又南逕阿陽縣故城東中平元年北地羌胡
與邊章侵隴右漢陽長吏蓋勳屯阿陽以拒賊卽
此城也其水又南與燕無水合水源延發東山西
注瓦亭水瓦亭水又南左會方城川西注瓦亭水
瓦亭水又南逕成紀縣東歷長離川謂之長離水

右與成紀水合源導西北當亭川東流出破石峽
津流遂斷故瀆東逕成紀縣故帝太皞庖犧所生
之處也漢氏以爲天水縣王莽之阿陽郡治也又
東潛源隱發通之成紀水東南入瓦亭川水又
東南與受渠水相會水東出大隴山西逕受渠亭
北又西南入瓦亭川水又西南流歷僵人峽路
側巖上有死人僵尸巒穴故岫壑取名焉釋鞍就
穴直上可百餘仞石路逶迤劣通單步僵尸倚窟
枯骸尚全唯無膚髮而已訪其川居之士云其鄉
中父老作兒童時已聞其長舊傳此當是數百年

骸矣其水又西南與略陽川水合水出隴山香谷
西西流右則單溪西往左則閣水入焉其水又西
歷蒲池郊石魯水出東南石魯溪西北注之其水
又西入略陽川西得破社谷水次西得平相谷水
又西得金里谷水又西得南室水又西得蹄谷水
並出南山北流於略陽城東揚波北注川水又西
逕略陽道故城北渥渠水出南山北逕埜峽北入
城建武八年中郎將來歙與蔡遵所部護軍王忠
右輔將軍朱寵將二千人皆持鹵刀斧自安民縣
之楊城永始二年成帝罷安定呼他死以爲安民

縣起官寺市里從審傾回中伐樹木開山道至略陽夜襲擊鄢拒守將軍金梁城等皆殺之因保其城隗鄢聞略陽陷悉衆以攻歙激水灌城光武親將鄢走西城世祖與衆會于此其水自城北注川一水二川蓋鄢所竭以灌略陽也川水西得白陽泉又西得蒲谷水西得蒲谷西川又西得龍尾溪水與渭谷水合俱出南山飛清北入川水水又西南得水洛口水源東導隴山西逕水洛高西南流又得犢奴水口水出隴山西逕犢奴川又西逕水洛亭南西北注之亂流西南逕石門峽謂之石

門水西南注略陽川略陽川水又西北流入瓦亭水瓦亭水又西南出顯親峽石巖水注之水出北山山上有女媧祠庖羲之後有帝女媧焉與神農爲三皇矣其水南流注瓦亭水瓦亭水又西南逕顯親縣故城東南漢封大鴻臚竇固爲侯國自石宕次得蝦蟇溪水得金黑水又得宜都溪水咸出左右參差相入瓦亭水又東南合安夷川口水源東出更胡谷西北流歷夷水川與東陽川水會謂之取陽交又西得何宕川水又西得羅漢水並自東北西南注夷水夷水又西逕顯親縣南西注瓦

亭水瓦亭水又東南得大華谷水又東南得折里
溪水又東得六合水皆出近溪湍峽注瓦亭水又
東南出新陽峽巉岫壁立水出其間謂之新陽壑
水又東南流于渭是也

又東過上邽縣

渭水東歷縣北封山流之陰逕固嶺北東東南流
蘭渠川水出自北山帶佩衆溪南流注于渭渭水
東南與神澗水合開山圖所謂靈泉池也俗名之
爲石萬灣淵深不測實爲靈異先後慢遊者多離
其斃渭水又東南得歷泉水北歷泉溪東南流注

于渭渭水又東南出橋西亭西又南得藉水口水
出西山百澗聲流總成一川東歷當亭川卽當亭
縣治也左則當亭水注之右則曾席水又東與大
弁州水出西山二源合注東歷大弁川東南流注
于藉水藉水又東南流與竹嶺水合水出南山竹
嶺二源同瀉東北入藉水藉水又次東北入上邽
縣左佩五水東會占溪水次東有大魯溪水次東
得小魯谷水次東有楊反谷水咸自北山注離注
藉水藉水右帶五水竹嶺東得亂石溪水次東得
水門谷水次東得羅城溪水次東得山谷水皆導

源南山北流入藉水藉水又東黃瓜水注之其水
發源黃瓜西谷東流逕黃瓜縣北又東清溪白水
左右夾注又東北大旱谷水南出旱溪歷澗北流
泉溪委漾同注黃瓜水黃瓜水又東北歷赤谷咸
歸于藉藉水又東毛泉谷水又東逕上邽城南又
得覈泉永並出南山北流注于藉藉水卽洋水也
北有濛水注焉水出縣西北邽山翼帶衆流積以
成溪東溪南屈逕上邽縣故城西側城南出土邽
故邽戎國也秦武公十年伐邽縣之舊天水郡治
五城相接北城中有湖水有白龍出是湖風雨隨

之故漢武帝元鼎三年改爲天水郡其鄉居悉以
板蓋屋詩所謂西戎板屋也濛水又南注藉水山
海經曰邽山濛水出焉而南流注于洋謂是水也
藉水又東得其陽谷水又得宕水谷水並自南山
北入于藉藉水又東合段溪水出西南馬門溪東
北流合藉水藉水又東入于渭渭水又歷橋亭南
而入綿諸縣東與東亭水合亦謂之爲橋水也清
水又或爲通稱矣水源東發小隴山衆川瀉浪統
成一水西入東亭川爲東亭水與小祗大祗二水
合又西北得南神谷水三川並出東南差池瀉注

又有埋蒲水翼帶二川與延水並西南注東亭水
東亭水又西右則驥溝水次西得麴谷水水側出
東南二溪西北流注東亭川東亭川水右則温谷
水出小隴山又西涉谷水出南北涉溪西南注東
亭川水東亭川水又西得清水口清水導源東北
隴山一源俱發西南出龍谷合成一水西南流磨
細野峽逕清池谷又逕清水縣故城東王莽之識
睦縣矣其水西南合東亭川謂之清水又逕清水
城南又西與秦水合水出東北大隴山秦谷二源
雙導歷三泉合成一水而歷秦川川有育故亭秦

仲所封也秦之爲號始自是矣秦水西逕降隴縣
故城南又西南自亥松多二水出隴山合而西南
流逕降隴城北又西南注秦水秦水又西南歷隴
川逕六槃口過清水城西南注清清上下咸謂之
秦川又西羌水注焉水北出羌谷引納衆流合以
成溪澨水星會謂之小羌水西南流左長谷水西
南注之右則東部水東南入焉羌水南入清水清
水又西南得綿諸水口其道源西北諸溪東南與
長思水北出思溪南入綿諸水又東南歷綿諸故
道北東南入清水清水東南注渭渭水又東南合注

水經 卷之十七
谷水水出西南注谷之山東北流與橫水合水出
東南橫谷西北逕橫水壙入西北注谷水亂流西
北出注谷峽又西北軒轅谷水注之水出南山軒
轅溪南安姚瞻以爲黃帝生於天水在上邽城東
七十里軒轅谷皇甫謐云生壽丘丘在魯東門北
未知孰是也其水北流注涇涇谷水又西北白城
谷溪東北流白娥泉水出其西東注白城水白城
水又東北入注谷水谷水又東北歷董亭下楊難
當使兄子保宗鎮董亭卽是亭也其水東北流注
于渭山海經曰注谷之山注水出焉東南流注于

渭是也渭水又東伯陽谷水入焉水出刑馬之山
伯陽谷北流白水出東南白溪水西北注伯陽水
伯陽水又西北歷谷引控羣流北注渭水又東歷
大利又東南流猫谷水注之水出南刑馬山北歷
平作西北逕苗谷屈而東逕伯陽城南謂之伯陽
川蓋李耳西入往逕所由故山原畎谷往往播其
名焉渭水東南流衆川瀉浪邊次鳴注左則伯陽
東谿水注之次東得望松水次東得毛六谿水次
東得皮周谷水次東得黃杜東溪水出北山南入
渭水其右則胡谷水次東丘谷水次東得丘谷東

雞水次東有銅巖谷水並出南山東北注渭渭水
又東南出石門度小隴山逕南田縣南東與楚水
合世所謂長蛇水水出刑縣之數歷山也南流逕
長蛇戍東魏和平三年築徙諸流民以過隴川楚
水又南流注于謂闕駟以是水爲汧水言又東汧
汧二水入焉余按諸地志汧水出汧縣西北闕駟
十三州志曰與此同復以汧水爲龍魚水蓋以其
津流逕通而更攝其通稱泉矣水東入散關抱朴
子神仙傳曰老子西出關關令尹喜候氣知真人
將有西遊者遇老子彊令之著書耳不得已爲著

道德二經謂之老子書也有老子廟于寶搜神記
云老子將西入關關令尹喜好道之士覩真人當
西乃要之途也皇甫士安高士傳云老子爲周柱
下史及周衰乃以官隱爲周守藏室史積八十餘
年好無名接而世莫知其真人也至周景王十年
孔子年十七遂適周見老聃然幽王失其道平王
東遷關以捍移人以職徙尹喜候氣非此明矣而
往逕所由茲焉或可是渭水又東逕西武功北俗
以散關城非也褚先生乃曰武功扶風西界小邑
也蜀口棧道近山無他豪易高者是也渭水又與

其捍水合水周道谷北逕武都故道縣之故城西王莽更名曰善治也故道縣有怒特祠列異傳曰武都故道縣有怒特祠云神本南山大梓也昔秦文公二十七年伐之樹瘡隨合秦文公乃遣四十人持斧斫之猶不斷疲士一人傷足不能去臥樹下聞鬼相與言曰勞攻戰乎其一曰足爲勞矣又曰秦公必特不休答曰其如我何又曰赤灰跋於子何如乃默無言臥者以告令士皆赤衣隨所斫以灰跋樹斷化爲牛入水故秦爲立祠其水又東北歷大散關而入渭水也渭水又東而又合南山五谿

水諸澗流注之也

又東過陳倉縣西

縣有陳倉山山上有寶雞鳴祠昔秦文公咸伯之言遊獵於陳倉遇之於此坂得若石焉其色如肝城如寶祠之故曰陳寶其來也自東南輝煌聲若雷野雞皆鳴故曰雞鳴神也地理志曰有上公明皇黃帝孫舜妻盲冢有羽隱宮秦武王起應劭曰縣氏陳山姚睦曰黃帝都陳言在此營氏開山圖注曰伏犧生成起徙治陳倉也非陳國所建也魏明帝遣將軍太原郝昭營陳倉城成諸葛亮圍之亮

使昭鄉人靳詳說之不下亮以數萬攻昭千餘人以雲梯衝車地道逼射昭昭以火射連石拒之亮不利而還今澗水對亮城是與昭相禦處也陳倉水出于陳倉山下東南流注于渭水渭水又東與陽谿合其水上承斜水水自斜谷分注綏陽谿北屈陳倉入渭故諸葛亮與兄瑾書曰有綏陽小谷雖山巉絕重谿水縱橫難用行軍者邏候往來要道通人今使前軍斫治此道以向陳倉足以振連賊勢使不得分兵東行者也渭水又東逕郁夷縣故城南地理志曰有汧水祠王莽更之曰郁平也

東觀漢書曰隗囂圍來歙於略陽世祖詔曰桃花水出船槃皆至郁夷陳倉分部而進者也汧水入焉水出汧縣之蒲谷鄉彊中谷決爲絃蒲藪爾雅曰水決之澤爲汧汧之爲名寔兼斯舉水有二源一水出縣西山世謂之小隴山巖嶂高峻不通軌轍故張衡四愁詩曰我所思今在漢陽欲往從之隴坂長其水東北流歷澗注以成淵潭漲不測出五色魚俗以爲靈而莫敢操捕因爲謂龍魚水爲龍魚水自下亦通謂之龍魚川川水東逕汧縣故城北史記秦文公東獵汧田因遂都其地是也又東歷

澤亂爲一右曰龍泉泉逕五尺源流奮通淪漪四
泄東北流注于汧汧水又東會一水發南山西側
俗以此山爲吳山三峰霞舉疊秀雲天崩巒傾返
山頂相桿望之恒有落勢地理志曰吳山在縣西
古之汧山也國語所謂虞矣山下石穴廣四尺高
七尺水溢石空懸波側注湍湊盪發源穴川北流
注于汧自水會上下咸謂之龍魚川汧水又東南
以逕隃麋縣故城南王莽之扶亭也昔郭欵耻王
莽之徵而遯跡於斯建武四年光武封耿澆爲侯
國矣汧水東南歷慈山東南逕郁夷縣逕平陽故

城南史記秦寧公二年徙平陽徐廣曰故郁之平
陽亭也城北有漢邠州刺史趙融碑靈帝建安元
年立汧水又東流于渭水渭水之右磻磻水注之
水出南山茲谷乘高激流注于溪中溪中有泉謂
之茲泉泉水潭積自成淵渚卽呂氏春秋所謂太
公釣茲泉也今人謂之几谷石壁深高幽隍邃密
林籬秀阻人跡罕交東南隅有石室蓋太公所居
也水流次平石釣處卽太公垂釣之所也其投竿
蹠餌兩鄰遺跡猶存是有磻磻之稱也其水清冷
神異北流十二里注于渭北去維堆城七十里渭

距本書空一行

水又東逕石源卽北原也青龍二年諸葛亮出斜谷與司馬懿屯渭南雍州郭淮策亮必爭北原而北遂先據之亮至渭水又逕五丈原北魏春秋曰諸葛亮據渭水南原司馬懿謂諸將曰亮若出武功依山東轉者是其憂也若西止五丈原諸君無事矣亮果屯此原與懿相禦渭水又東逕郿縣故城南地理志曰右輔都尉治魏春秋諸葛亮寇郿司馬懿據郿拒亮卽此縣也

水經第十七

水經第十八

酈道漢注桑欽撰

後魏酈道元注

明吳瑄校

渭水中

又東逕武功縣北

渭水於縣斜水自南注之水出縣西南衙嶺山北歷斜谷逕五丈原東諸葛亮與步騭書曰僕前軍在五丈原原在武功西十里餘水出武功縣故亦謂之武功水也是以諸葛亮表云臣遣虎步監孟

下空五字

琰據武功水東司馬懿因水長攻琰營臣作竹橋
越水射之橋成馳去其水北流注于渭地理志曰
斜水出衙嶺北至郿注渭水又東逕馬冢北諸葛
亮與步騭書曰馬冢在武功東十餘里有高勢攻
之不便是以留耳渭水又逕武功縣故城北王莽
之新光也地理志曰縣有太一山古文以爲終南
杜預以爲中南也亦曰太白山在武功縣南去長
安二百里不知其高幾何俗云武功太白去天三
百山下軍行不得鼓角鼓角則疾風雨至杜彥達
曰太白山南連武功山於諸山最爲秀傑冬夏積

雪望之皓然山上有谷春祠春櫟陽人成帝時病
死而尸不寒後忽出櫟南門及光門上而入太白
山民爲立祠於山嶺春秋來祠中山宿焉山下有
太白祠民所祀也劉曜之世是山崩長安人劉終
咨崩忘也惠公孝公立是穆公之後繼世之君矣
子孫無由起宮於祖宗之墳陵矣以是推之知二
證之非實也而左會左陽水世名之西水北出左
陽谿南流逕岐州城西魏置岐州刺史治左陽水
又南流注于雍水雍水又與東水合俗名也北出
河桃谷南流右會南源世謂之返眼泉亂流南逕

岐州城東而南合雍水州居二水之中南則兩川
之交會也世亦名之爲涑空水東流鄧公泉注之
水出鄧艾祠北故名曰鄧公泉數源俱發於雍縣
城南縣故秦德公所居也晉書地道記以爲西虢
地也漢書地理志以爲西虢縣太康記曰虢叔之
國矣有虢宮平王東遷叔自此之上陽爲南虢矣
雍有五時祠以上祠祀五帝昔秦文公田于泝渭
之間夢黃虵自天屬地其口止於廊衙以爲上帝
之神於是作廊時祠白帝秦宣公作密時於陳倉
北坂祀青帝焉蠡公又於吳陽作上時祀炎帝焉

獻公作畦時祠赤帝焉漢高帝問曰天有五帝今
何四也博士莫知共故帝曰我知之矣待我而五
遂立北時祀黑帝焉應劭曰四面積高曰雍闕駟
曰宜爲神明之隩故立羣祠焉又有鳳臺鳳女祠
秦穆公時有蕭史者善吹簫能致白鵠孔雀穆公
女弄玉好之公爲作鳳臺以居之積數十年一旦
隨鳳去云雍宮世有簫管之聲焉今臺傾祠毀不
復然矣鄧泉東流注于雍自下雖會他津猶得通
稱故禹貢有雍沮會同之文矣雍水又東逕郿亭
南世謂之樹亭川蓋郿樹聲相近誤耳亭被郿公

乏采邑也京相璠曰城在周城南五十里後漢郡國志曰郿縣有郿亭謂此也雍水又東南流與杜水合水出杜陽山其水南流謂之杜陽川東南流左會漆水水出杜陽之縣漆籛謂之漆渠故徐廣曰漆水出杜陽之岐山者是也漆水渠水南流大欒水注之出西北大道川東南流入漆卽故岐水也淮南子曰岐水出石橋山東南流相如封禪書曰牧龜於岐漢書音義曰岐水名也謂斯水矣二川洋逝俱爲一水南與杜水合俗謂之小黃水亦或名之米流川逕岐山而又屈逕周城南城在岐

山之陽而近西所謂居岐之陽也非直因山致名亦指水取稱矣又歷周原下北則中水鄉成周聚故曰有周也水北卽岐山矣昔秦盜食穆公馬處也岐水又東逕姜氏城南爲姜水按世本炎帝姜姓帝王世紀曰炎帝神農氏姜母曰嫫遊華陽感神而生炎帝長於姜水水合而東逕美陽縣之中亭川水也水發杜陽縣大嶺側世謂之赤泥峴泂波歷澗俗名大橫水也疑卽杜水矣其水東南流東逕杜陽故城東西三百步南北二百步世謂之故縣川又故谷縣有杜陽山山北有杜陽谷有地

穴北入亦不知所極在天柱山南故縣取名焉亦指是水而構自矣卽王莽之通杜也故地理志曰縣自杜水東二坑水注之水有二原一水出西北犢騮水二合而東歷五將山又合鄉谷水水出鄉鬻東南流入杜謂之鄉谷川又南莢水注之水出好時縣梁山大嶺泉南逕梁山宮西故地理志曰好時有梁山宮秦始皇起水東有好時縣故城王莽之好邑也世祖建武二年封建威大將軍耿弇爲侯國又南逕美陽縣之中亭川注雍水謂之中亭水又南逕美陽縣西永元二年更封鄣雍侯耿

秉爲侯國其水又南流注于渭渭水又東逕郿塢南漢獻帝傳曰董卓發卒築郿塢高與長安城等積穀爲三十年儲自云事成雄據天下不成守此足以異老其愚如此渭水之東洛谷之水出其南山洛谷北流逕長城西魏甘露三年蜀遣姜維出洛谷圍長城卽斯地也又東芒水從南來流注之

芒水出南芒谷北流逕玉女房水側山際有石室世謂之玉水房芒水又北逕蓋屋縣之竹園中分爲二水漢

中 崔義作辭於 霍鴻負倚蓋屋芒竹卽此也

流一水 東北為枝一水北流注于渭也

水經第十八

水經第十九

渭水下

漢道桑注欽撰
後魏酈道元注
明 吳 瑄校

渭水又東過槐里縣南又東澇水從南來注之

渭水逕縣之故城南漢書集注李奇謂之小槐里
之西城也又東與芒水枝流合水受芒水於竹圃
東北流又屈而北不渭

渭水又東北逕黃山宮南

卽地理志所云縣有黃山宮惠帝三年起者也東方朔傳曰武帝微行西至黃山宮故世謂之遊城非也

就水注之

水出南山就谷北逕大陵西世謂之老子陵昔李聿爲周柱史以世衰入戎於此有冢事非經證然莊周著書云老聃歿秦佚弔之三號而出是非不歿之言人稟五行之精氣陰陽有終變亦無不化之理以是推之或復如傳古人許以傳疑故兩存耳就水歷圃北與黑水合上承三泉就水之右三

泉之音發言歸一瀆北流左逕就水就水又北流注于渭

渭水又東合田谿水

水出南山田谷北流長楊宮西又北逕蓋屋縣故城西又東北與一水合水上承蓋屋南南泉北逕其縣東又北逕思鄉城西又北注田谿田谿水又北注流于渭水也縣苑有蒙龍源上承渭水於郿縣東逕武功縣爲成林源東逕縣苑亦曰靈軹源河渠以引堵水徐廣曰一作諸水是也

渭水又東逕槐里縣故城南

縣古太丘邑也周赧王都之秦以爲廢丘亦曰舒丘和平元年桓帝封左中郎將皇甫嵩爲侯國縣南對渭水北背通渠史記秦本紀云秦武王三年渭水赤三日秦昭三十四年渭水又大赤三日鴻範五行傳曰赤者火色也水盡赤以火沴水也渭水秦大川也陰陽亂秦用嚴刑敗亂之象後項羽入秦封司馬欣爲塞王都櫟陽董翳爲翟王都高奴章邯爲雍王都廢丘居槐里爲三秦漢祖北定三秦引水灌城遂滅章邯三年改曰槐里王莽更名槐治也世謂之爲大槐里晉太康中始平郡治

也其城遞帶防陸舊渠尚存卽漢書所謂槐里環隄者也東有漏水出南山赤谷東北流逕長楊宮東宮有長楊樹因以爲名漏水又北遷葦園西亦謂之仙澤又北逕望仙宮又東北耿谷水注之水發南山耿谷北流與柳泉合東北逕五柝相去八里並以樹名宮亦由陶氏以五柳立稱故張晏曰宮有五柝樹在盩厔縣西其水北逕仙澤東北又逕望仙宮東又北與赤水會又北逕思鄉城東又北注渭水

渭水又東合甘水

水出南山甘谷北逕秦文王萇陽宮西又北逕五
柞宮東又北逕甘亭西在水東鄠縣昔夏啓伐有
扈作誓於是亭故馬融曰有扈甘南郊地名也甘
水又東得澇水口水出南山澇谷北逕漢宜春觀
又東北逕鄠縣故城西澇水際城北出合漢陂水
水出宜春觀北東北流注澇水北流入于渭卽上
林故地也東方朔稱武帝建元中微行北至池陽
西至黃山南獵長楊東遊宜春夜漏十刻乃出於
絳中常侍武騎待詔及隴西北地良家子能騎射
者期諸殿門故有期門之號旦明入山下馳射鹿

豕狐兔手格熊羆上大驩樂之上仍使太中大夫
虞丘壽王與待詔能用竿者舉措阿城以南蓋屋
以東宜春以西提封頃畝及其賈宜屬之南山以
爲上林苑東方朔諫秦起阿房而天下亂因陳泰
階六符之事上乃拜太中大夫給事中賜黃金百
斤卒起上林苑故相如請爲天子遊獵之賦稱烏
有先生亡是公而奏上林也
又東豐水從南來注之

他說云渭水又東與豐水會于短陰山內水會無
他高山異巒所有唯原阜石激而已水上舊有便

門橋與便門對直武帝建武三年造張昌曰橋在
長安西北茂陵東如淳曰去長安四十里渭水又
逕太公廟北前有太公碑文字褫缺今無可尋
渭水又東北與鎬水合

水上承鎬池於昆明池北周武王之所都也故詩
云考卜維王宅是鎬京維龜正之武王成之自漢
帝穿昆明池於是地基構淪褫今無可究春秋後
傳曰使者鄭客入柏谷關至平舒置見華山有素
車白馬問鄭客安之荅曰之咸陽過鄠池曰吾華
山君使願託書致鄠池君子之咸陽過鄠池見大

梓下有文石取以欵耜梓當有應者以書與之勿
妄發致之得所欲鄭客行至鄠池見一梓下果有
文石取以欵梓應曰諾鄭客如睡覺而見宮闕若
王者之居焉謁者出受書入又見頃闡譴聲言祖
龍死神道茫昧理難辨測故無以精其幽致矣鄠
水又北流西北注與滈池合水出鄠池西而北流
入于鄠毛詩云滈流浪也而世傳以爲水名矣鄭
玄曰豐鎬之間水北流也鎬水北逕靈臺西又
逕磁石門西門在阿房前悉以磁石爲故專其目
合四夷朝者有隱甲懷刃入門而脅之以示神故

亦曰却胡門也鎬水又北逕于渭渭水北有杜郵亭去咸陽十七里今名孝里亭中有白起祠嗟乎有制勝之功慙尹商之仁是地即其伏劔處也

渭水又東北逕渭城南

文穎以爲故咸陽矣秦孝公之所居離宮也獻公都櫟陽天雨金周太史儋見獻公曰周故與秦國合而別別五百歲復合合七十歲而霸王出至孝公作咸陽築冀闕而徙都之故西京賦曰秦里其霸寔爲咸陽太史公曰長安故咸陽也漢高帝更名新城武帝元鼎三年別爲渭城在長安西北渭

水之陽王莽之京城也始隸扶風後并長安而沈水注之

其水上承皇子陂於樊川其地即杜之樊鄉也漢祖至櫟陽以將軍樊噲灌廢丘最賜邑於此鄉也其水西北流逕杜縣之杜京西西北流逕杜伯冢南杜伯與其友左儒仕宣王儒無罪見害杜伯死之終能報恨於宣王故成公子安五言詩曰誰謂鬼無知杜伯射宣王沈水又西北逕下杜城即杜伯國也沈水又西北支合故渠渠有二流上承交水合於高陽原而北逕河池陂東而北注沈水沈

水又北與昆明故池會又北逕秦通六基東又北逕竭水陂東又北得陂承其陂東北流入于沈水沈水又北逕長安城西與昆明池水合水上承池於昆明臺故王仲都所居也桓譚新論稱元帝被病廣求方士漢中送道士王仲都詔問所能對曰能忍寒暑乃以昆明池上環水而馳御者厚衣狐裘寒戰而仲都獨無變色卧於池臺上矐然自若夏大暑日使曝坐環以十爐火不言熱又身不汗池水北逕鎬京東秦阿房宮西史記曰秦始皇三十五年以咸陽之人多先王之宮小乃作朝宮於

渭南亦曰阿城也始皇先作前殿阿房可坐萬人下可建五丈旗周爲閣道自殿直抵城南山表山顛爲闕爲複道自阿房度渭屬之咸陽象天極閣道絕漢抵營室也關中記曰阿房殿在長安西南二十里殿東西千步南北三百步庭中受十萬人其水又屈而逕其北東北流注揭水陂陂水北出逕漢武帝建章宮東於鳳闕南東注沈水又北逕鳳闕東三輔皇圖曰建章宮漢武帝造周二十餘里千門萬戶其東鳳闕高七丈五尺俗言真女樓非也漢武帝故事云闕高二十丈關中記曰建章

宮圓闕臨北道有金鳳在闕上高丈餘故號鳳闕
越繁欽建章鳳樓闕賦曰秦漢規模廓鑿毀泯唯
建章鳳闕巋然獨存雖非象魏之制亦一代之巨
觀也沈水又北分爲二水一水東北流一水北逕
神明臺東傳子宮室曰上於建章中作神明臺井
榦樓咸高五十餘丈皆作懸閣輦道相屬焉三輔
黃圖曰神明臺在建章宮中上有九室今人謂之
九子臺而實非也沈水又逕漸臺東漢武故事曰
建章宮北有太液池池中有漸臺三十丈漸浸也
爲池水所漸一說星名也南有壁門三層高三十

餘丈中殿十二間階陛咸以玉爲之鑄銅鳳五丈
飾以黃金樓屋上椽首薄以玉壁因曰壁玉門也
沈水又北流注渭亦謂是水爲滴水也故呂忱曰
滴水出杜陵縣漢書音義曰滴水聲而非水也亦
曰高都水前漢之末五侯王氏大治池沼鄴宅水
入長安城故百姓歌之曰五侯初起曲陽最怒壞
決高都竟連五杜上山漸臺像西白虎卽是水也
又東過長安縣北

渭水東分爲二水廣雅曰水自渭出爲梁其由河
之有雍也此瀆東北流逕魏雍州刺史郭淮碑南

又東南合一水逕兩石人北秦始皇造橋鐵鑿重
不勝故刻石作力士孟賁等像以祭之鑿乃可移
動也又東逕陽侯祠北漲輒祠之此神能爲大波
故配食河伯也後人以爲鄧艾祠悲哉讒勝道消
專忠受害矣渭水又東注此水水上有梁謂之渭
橋秦制也亦曰便門橋秦始皇作離宮於渭水南
北以象天宮故三輔黃圖曰渭水貫都以象天漢
橫橋南度以法牽牛橋廣六丈南北二百八十步
六十八間七百五十柱北馮翊立之有一百二十
二梁橋之南北有隄激立石柱柱南京兆立之柱

北馮翊立之有令丞各領徒一千五百人橋之北
首壘石水中故謂之石柱橋也舊有村畱神像此
神嘗與魯班語班令其人出村畱曰我貌獯醜卿
善圖物容我不能出班於是拱手與言曰出頭見
我村畱乃出首班於是以脚畫地村畱覺之便還
沒水故置其像於水唯背以上立水上後董卓入
關遂焚此橋魏武帝遂更修之橋三丈六尺村畱
之像曹公乘馬見之驚又命下之燕丹子曰燕太
子丹質於秦秦王遇之無禮乃求歸秦王爲機發
之橋欲以陷丹丹過之橋不爲發又一說交龍捧

輦而機不發但言今不知其故處矣

渭水又東與沈水枝津合

水上承沈水東北流逕鄧艾祠南又東分爲二水
一水東入逍遙園注藕池池中有臺觀蓮荷被浦
秀實可翫其一水北流于渭

渭水又逕長安城北

漢惠帝元年築六年成卽咸陽也秦離宮無城故
城之王莽更名曩安十二門東出北頭第一門本
名宣平門王莽更名春王門正月亭亦曰東城門
其郭門亦曰東都門卽逢萌桂冠處也第二門本

名清明門一曰凱門王莽更曰宣德門布恩亭內

有藉田倉亦曰藉田門第三門本名霸城門王莽

更名仁壽門無疆亭民見門色青又名青城門或

曰青綺門亦曰青門門外舊出雜瓜昔廣陵人邵

平爲秦東陵侯秦破爲布衣種瓜此門瓜美故世

謂之東陵瓜是以阮籍詠懷詩曰昔聞東陵瓜近

在青門外連畛拒阡陌子毋相鈎帶指謂此門也

南出東頭第一門本名覆盎門王莽更名永清門

長茂亭其南有下杜城應劭曰故杜陵之下聚落

也故曰下杜門又曰端門北對長樂宮第二門本

名安門亦曰鼎路門王莽更名光禮門顯樂亭卽
西安亭北對未央宮本名平門王莽更名信平門
城正亭西出南頭第一門本名章門王莽更名萬
秋門億年亭亦曰光畢門也又曰便門第二本名
直門王莽更名直道門端路亭故龍樓門也張晏
曰門樓有銅龍三輔黃圖曰長安西出第二門卽
此門也第三門本名西城門亦曰雍門王莽更名
章義門著誼亭其水北入有函里氏名曰函里門
又曰光門亦曰突門北出西頭第一門本名橫門
王莽更名霸都門左幽亭如淳曰音光故曰光門

其外郭有都門有棘門徐廣曰棘門在渭北孟康
曰在長安北秦時宮門也如淳曰三輔黃圖曰棘
門在橫門外按漢書徐厲軍於此備匈奴又有通
門亥門也其第二門本名洛門又曰朝門王莽更
名建子門廣世亭一曰高門蘇林曰高門長安城
北門也又逕觀愚之山北流入于渭渭水又東西
石橋水南出馬嶺山積石據其東麗山距其西源
西上通懸流數十丈與華岳同體其水北逕鄭城
西承上有橋橋雖崩褫舊跡猶存東去鄭城十里
故世以橋名水也而北流注于渭闕駟謂之新鄭

水渭本又東逕鄭縣故城北史記秦武公十年縣
之栢公友之故邑也漢書薛瓚注言周自穆公已
下都於西鄭不得以封栢公也幽王既敗虢儻又
滅遷居其地國于鄭父之丘是爲鄭栢公無封京
兆之文余按遷史記考春秋國語世本言周宣王
二十二年封庶弟友於鄭又春秋國語並言栢公
爲周司徒以王室將亂謀於史伯而寄擎與賄於
虢儻之間幽王寧於戲鄭栢公咎之平王東遷鄭武公
輔王室滅虢儻而兼其土故周栢公言於王曰我
周之東遷晉鄭是依及遷封於彼左傳隱公十一

年鄭袖公孫獲曰吾先君新邑於此其能與許爭
乎是其指新鄭爲言矣然班固應劭鄭玄皇甫謐
裴顧王隱闕駟及諸述作者咸以西鄭爲友之始
封也賢於薛瓚之單說也無宐違正經而從逸錄
矣赤眉樊崇於鄭北設壇祀城陽景王而尊右稜
卒史劉俠卿牧牛兒盆子爲帝年十五被髮徒跣
爲具絳單衣半頭赤幘直綦履顧見衆人拜恐畏
欲啼號年建世後月餘乘白蓋小車與崇及尚書
一人相隨向鄭北渡渭水卽此處也城南山北有
五部神廟東南向華嚴廟前有碑後漢光和四年

鄭縣令河東裴畢字君先立蘇林曰戲邑名在新豐
東南三十里孟康曰乃水名也今戲亭是也昔周
幽王悅褒姒姒不笑王乃擊鼓舉烽以徵諸侯至
無寇褒姒乃笑王甚悅之及犬戎至王又舉烽以
徵諸侯諸侯不至遂敗幽王於戲水之上身歿於
麗山之北故國語曰幽滅者也漢成帝建始二年
造延陵爲初陵以爲非霸曲亭南更營之鴻嘉元
年於新豐戲鄉爲昌陵縣以奉初陵永始元年詔
以昌陵卑下客土踈惡不可爲萬歲居其罷陵作
令吏民反故徙將作大匠解延年燉煌關中記曰

昌陵在霸城東二十里取土東山與粟同價所廢
巨萬積年無成卽此處也戲水又北分爲二水並
注渭水渭水又東冷水入焉水南出肺浮山蓋麗山
連麓而異名也北會三川統歸三壑歷鞏槃新豐
兩原之間北流注于渭渭水又東首水南倒虎山
南總五水單流注逕秦步壽宮東世名立市城歷
新豐原東而北逕步壽宮西又北入渭渭水又東
得西陽水又東得東陽水並南出廣鄉原北垂俱
北入渭渭水又東石橋水會故沈水也水南出馬
嶺山北流逕武平城東按地理志左馮翊有武城

縣王莽之桓城也石橋水又逕鄭城東水有故石
梁述徃記曰鄭城東十四里各有石梁者也又此
逕沈城北漢書地理志左馮翊有沈陽縣王莽更
之曰制昌也蓋藉水以取稱矣渭水又東敷水注
之水南出石山之敷谷北逕告平城東者舊所傳
言武王伐紂告太平於此故城得闕名非所詳也
敷水又北逕集靈宮西地理志曰華陰縣有集靈
宮武帝起故張昶華嶽碑稱漢武慕其靈築宮在
其後而北流注于渭渭水又東餘水注之水南出
良餘山之陰北流入于渭俗謂之宣水也渭水又

東合黃酸之水世名之爲千渠水水南出升山北
流注于渭渭水又東逕平舒城北城側枕渭濱半
破淪水南面通衢昔秦始皇之將亾也江神素車
白馬道華山下返璧於華陰平舒道曰爲遺鎬池
君使者致之乃二十八年度江所沈璧也卽江神
返璧處也渭水之陽卽懷德縣界也城在渭水之
北池苑之南卽懷德縣故城也世謂之高陽城非
矣地理志曰禹貢北條荆山在南山下有荆渠卽
夏后鑄九鼎處也王莽更縣曰德驩渭水又東逕
長城北長澗水注之禾南出太華之山側長城東

而北流注于渭水史記秦孝公元年楚魏與秦接
界魏築長城自鄭濱洛者也

又東過華陰縣北

洛水入焉闕駟以爲漆沮之水焉曹瞞傳曰操與
馬超隔渭水每渡渭輒爲超騎所衝突地多沙不
可築城婁子伯說今寒可起沙爲城以水灌之一
宿而成操乃多作縑囊以灑水夜汲作城立於是
水之次也渭水逕縣故城北春秋之陰晉也秦惠
文王五年改曰寧秦漢高帝八年更名華陰王莽
之華疆也縣有華山山海經曰其高五千仞削成

而四方遠而望之又若華狀西南有小華山也韓
子曰秦昭王令土施鈎梯上華山以節桓之心爲
博箭長八尺棋長八寸而勒之曰昭王常與天神
博於是神仙傳曰山中衛叔卿嘗乘雲車駕白鹿
見漢武帝帝將臣之叔卿不言而去武帝悔求得
其子度世令追其父度世登華見父與數人博於
石上勅度世令還山山層雲秀故能懷靈抱異耳
山上有二泉東西分流至若山雨潏并洪津泛灑
搯溜騰虛直瀉山下有漢魏文帝三廟廟有石闕
數碑一碑是建安中立漢鎮遠將軍段熲更修祠

堂碑文漢給事黃門侍郎張彙造彙自書之元帝
又刊其二十餘字二書有重名傳於海內又刊傳
中司隸校尉鍾繇弘農太守毋丘儉姓名廣六行
鬱然循平是太康八年弘農太守河東衛叔始爲
華陰令河東裴仲恂役其逸力修立壇廟夾道樹
栢迄于山陰事見永興元年華百石所造碑渭水
又東沙渠水注之水出南山北流西北入長安城
城自華山北逕于河華嶽銘曰秦晉爭其祠立城
建其左者也郭著述徂記指證魏之立長城長城
在後不得言在斯爲非矣渠水又北注入渭渭水

又東逕定城北西征記曰城因原土述徂記曰定
城去潼關三十里夾道各一城渭水又東泥泉水
注之水出南山靈谷而泉北流注于渭水也渭水
又東合沙溝水水卽符愚之水也南出符石逕新
豐縣故城北東與魚池水會水出麗山東也水本
導源東流後秦始皇葬於山北水過而曲行東注
北轉始皇造陵取土其地汙深水積成池謂之魚
池池在秦皇陵東北五里周圍四里池水西北流
逕始皇冢北秦始皇大興厚葬營建冢壙於麗戎
之山一名藍田其陰多金其陽多玉始皇貪其美

名因而葬焉斬山鑿石下涸三泉以銅爲槨旁行
周迴三十餘里上畫天文星宿之象下以水銀爲
四瀆百川五嶽九州具地理之勢宮觀百官奇器
珍寶充滿其中令匠作機弩有所穿近輒射之以
人魚膏爲燈燭取其不滅者久之後宮無子者皆
使殉葬甚衆墳高五丈周迴五里餘作者七十萬
人積年方成而周章百萬之師已至其下乃使章
邯領作者以禦難弗能禁項羽入關發之以三十
萬人三十日運物不能窮關東盜賊銷槨取銅牧
人尋羊燒之火延九十日不能滅北對鴻門十里

池水又西北流水之西南有溫泉世以療疾三秦
記曰麗山西北有溫水祭則得入不祭則爛人肉
俗云始皇與神女唾之生瘡始皇謝之神女爲出
溫水後人因以燒洗瘡張衡溫泉賦序曰余遊麗
山觀溫泉浴神井嘉洪澤之普施乃爲之賦云此
湯也不使灼人形體矣池水又逕鴻門西又逕新
豐縣故城東故麗戎地也高祖王關中太上皇思
東歸故象舊里制茲新邑立城社樹枌榆令街庭
若一分置豐民以實茲邑故名之爲新豐也漢靈
帝建寧三年改爲都鄉封段熲爲侯國後立陰槃

城其水際北城出謂是水爲陰槃水又北絕漕槃
溝注于渭渭水又東逕鴻門北舊大道北下坂下
坂名也古有鴻寧漢書高祖將見項羽楚漢春秋
曰項王在鴻門亞父曰吾使人望沛公其氣衝天
五色相繆或似龍或似雲非人臣之相可誅之漢
高祖會項羽范增目羽羽不應樊噲杖盾撞人入
食豕肩於此羽壯之郡國志曰新豐縣東有鴻門
亭者也郭緣生或云霸城南門曰鴻門也項羽將
因會高祖危高祖羽仁而弗斷范增謀而不納項
伯終護高祖以獲免既抵霸上遂封漢王按漢書

注鴻門在新豐東十七里則霸上應百里按史記
項伯夜馳告張良良與俱見高祖仍使夜返考其
道里不容得爾今父老傳在霸城南門數十里於
理爲得按緣生此記雖歷覽史漢述行涂逕見可
謂學而不思矣今新豐縣故城東三里有坂長二
里餘塹原通道南北洞開有同門狀謂之鴻門孟
康言在新豐東十七里無之蓋指縣治而言非謂
地也自新豐故城西至霸城五十里霸城西十里
則霸水西二十里則長安城應劭曰霸水上地名
在長安東二十里卽霸城是也高祖舊停軍處東

去新豐既遠何由項伯夜與張良共見高祖乎推此言之知緣生此記乖矣渭水又東石川水南注焉渭水又東戲水注之水出麗山馮公谷東北流又北逕麗戎城東春秋晉獻公五年伐之獲麗姬於是邑麗戎男國也姬姓秦之麗邑矣又北右總三川逕鴻門東又北逕戲亭東應劭曰戲弘農湖縣西界也地隔諸縣不得爲湖湖西如北一里卽李夫人冢冢形三成世謂之荻陵夫人兄延年知音尤善歌舞帝愛之每爲新聲變曲聞者莫不感動常侍上起舞歌曰北方有佳人絕世而獨立一

顧傾入城再顧傾人國寧不知傾城復傾國佳人難再得上曰世豈有此人乎平陽主曰延年女弟上召見之妖麗善歌舞得幸早卒上憫念之以厚禮葬悲思不已賦詩悼傷故渠又東逕茂陵縣故城南武帝建元二年置地理志曰宣帝縣焉王莽之宣成也故渠又東逕龍泉北今人謂之溫泉非也渠北故坂此卽龍淵廟如淳曰三輔黃圖有龍淵宮今長安城西有其處廣蓋宮之遺也故渠又東逕姜原北渠北有漢昭帝平陵東南去長安七十里又東逕平陵縣故城南地理志曰昭帝置王

莽之廣利也故渠之南有竇氏泉北有徘徊廟又東逕漢大將軍魏其侯竇嬰冢南又成帝延陵南陵之東北五里卽平帝康陵坂也故渠又東逕渭陵元帝永元四年以渭城壽陵亭原上爲初陵詔不立縣邑又東逕哀帝義陵南又逕惠帝安陵南陵北有安陵縣故城也地理志曰惠帝置王莽之嘉平也渠側有杜郵亭又東逕渭城北地理志曰縣有蘭池宮秦始皇微行逢盜於蘭池今不知所存也又東逕長陵南亦曰長山也三秦記曰長安城北有平原廣數百里民井汲巢居井深五十丈

秦名天子冢曰山漢曰陵故通曰山陵矣風俗通曰陵者天生自然者也今王公墳隴稱陵春秋左傳曰南陵夏后臯之墓也春秋說題辭曰丘者墓也冢者種也種墓也羅倚於山分卑尊之名者也渭水又東逕下邳縣故城南秦伐邾置邾戎於此有上邳故加下也渭水又東與竹水合南出竹山北逕櫛加谷歷廣鄉原東俗謂之大赤水北流注于渭渭水又東得白渠口太始二年趙國中大夫白公奏穿渠引涇水口起谷口出於鄭渠南名曰白渠民歌之曰由于何所池陽谷口鄭國在前白

渠在後卽水所始也東逕宜春城南又東南逕池陽城北枝瀆出焉東南逕藕原下逕鄆縣故城北東南入渭今無水白渠又東枝渠出焉東南逕高陵縣故城北地理志曰左輔都尉治王莽之千春也太康地記謂之曰高陸也車頻秦書曰符堅建元十二年高陸縣民穿井得龜大二尺六寸背文負八卦古字堅以石爲池養之十六年而死取其骨以問吉凶名爲客龜太卜佐高夢客龜言我將歸江南不遇死於秦曾於夢中自解曰龜三萬六千歲而終終必亡國之徵也爲謝玄破於淮肥自

縊新城浮圖中秦祚因卽淪矣又東逕櫟陽城北史記秦獻公二年城櫟陽自雍徙居之十八年雨金於是處也項羽以封司馬忻爲塞王按漢書高帝關中始都之王莽之師高也後漢建武二年封驃騎大將軍景丹爲侯國丹讓世祖曰富貴不還故鄉如衣錦夜行故以封卿白渠又東逕秦孝公陵北又東南逕居陵城北蓮芍城南又東注金氏陂又東南注于渭故漢書溝洫志白渠首起谷口尾入櫟陽是也今無水故渠又東逕漢丞相周勃塚南塚北有弱夫塚故渠東南謂之周氏曲又東

南逕漢景帝陵南又東南注于渭今無水渭水又東逕霸縣北與高陵分水水南有定陶恭王廟傳太后陵元帝崩傳昭儀隨王歸國稱定陶太后後十年恭王薨子代爲王徵爲太子太子卽帝位立恭王寢廟乎京師比宣帝父悼皇故事元壽元年傳后崩合葬渭陵潘岳關中記漢帝后同塋則爲合葬不共陵也諸侯皆如之恭王廟在霸城西北廟西北卽傳太后陵不與元帝同塋渭陵非謂元帝陵也蓋在渭水之南故曰渭陵也陵與元帝齊者謂同十二丈也王莽奏毀傳太后塚塚崩壓殺

數百人開棺梟聞數月公卿在位皆阿莽旨入錢帛遣子弟及諸生四夷凡十餘萬人操持作具助將作掘傳后塚二旬皆平周棘其處以爲世戒今其處積土猶高世謂之增墀又亦謂之增阜俗亦謂之成帝初陵處所未詳也渭水又逕平阿侯王譚墓北塚次有碑左則涇水注之渭水又東逕鄠縣西蓋隴西郡之鄠徒也渭水又東得白渠枝口又東與五丈渠合水出雲陽縣石門山謂之清水東南流逕黃嶽山西又南入役初縣歷原南出謂之清水口東南流絕鄭渠又東南入高陵縣逕黃

白城西本曲梁宮也南絕白渠屈而東流謂之曲
梁水又東南逕高陵縣故城北東南絕白渠瀆又
東南入萬年縣謂之五丈渠又逕藕原東東南流
注于渭水

又東過鄭縣北

渭水又東逕巒都城北故潘邑殷契之所居世本
曰契居蕃闕駟曰蕃鄭西然則今巒城是矣俗名
之赤城水曰赤水非也苻健入秦據此城以亢杜
洪小赤水卽山海經之灌水也水出石脆之山北
逕蕭加谷於孤相原西東北流與愚水合出英山

北流與招水相得水亂流西北注于灌灌水又北
注于渭

又東過霸陵縣北霸水從縣西北流注之

霸水者上地名也古曰滋水矣秦穆公霸水更名
滋水爲霸水以顯霸功水出藍田縣藍田谷所謂
多玉者也西北有銅公水次東有輕谷二水合而
西注之又西流入渥水渥水又西逕嶢關北歷柳
嶢城東西有二城魏置清渥軍於城內世亦謂之
清渥城也秦二世三年漢祖入自武關攻秦趙高
遣將距於嶢關者也土地記曰藍田縣南有嶢關

地名嶢柳道通荊州晉地道記曰關當上洛縣西
北渥水又西北流入霸霸水又北歷藍田川逕藍
田縣也竹書紀年梁惠王三年秦子向命爲藍君
孟子向之故邑也川有漢臨江王榮冢景帝以罪
徵之將行祖於江陵北門車軸折老父泣曰吾王
不及矣榮至中尉郅都急切責王王年少恐而自
殺葬於是川有鷲數萬銜土置塚上百姓矜之霸
水又左合澹水歷白鹿原東卽霸川之西故芷陽
矣史記秦襄王葬芷陽者也是謂之霸上漢文帝
葬其上謂之霸陵上有四出道以瀉水在長安東

南三十里故王仲宣賦詩云南登霸陵岍迴首望
長安漢文帝嘗欲從霸西馳下峻坂袁盎攬轡於
此處上曰將軍怯也盎曰臣聞千金之子坐不垂
堂百金之子立不倚衡聖王不乘危今馳不測如
馬驚車敗柰高廟何上乃止霸水又北長水注之
水出杜縣白鹿源其水西北流謂之荆谿谿水又
西北左合狗枷川水水有二源西川上承魄山之
斫槃谷次東有苦谷二水合而東北流逕風涼原
西關中圖曰麗山之西川中有阜名曰風涼原在
魄山之陰雍州之福地卽是原其水傍谿北注原

上有漢武帝祠其水者合東川水出南山之石門
谷孟谷次東又^有大谷次東有雀谷東有土門谷五
水北谷西北歷風涼原東又北與西川會原爲二
水之會亂流北逕宣帝許后陵東而北去杜陵十
里斯川於是有狗枷之名川東亦曰白虎原也上
有狗枷堡三秦記曰麗山西有白鹿原原上有狗
枷堡秦襄公時有大狗來下有賊則狗吠之故一
堡無患故川得厥自焉川水又北逕杜陵東元帝
初元元年葬宣帝杜陵北去長安五十里陵之西
北有杜縣故城秦武公十一年縣之漢宣帝元康

以杜東原上爲初陵更名杜縣爲杜陵也王莽之
饒安也其水又北注荆谿荆谿水又北入霸縣又有
溫泉入焉水發自原下入荆谿水亂流注于霸俗謂
之漑水非也史記音義文帝出安門注云在霸陵
縣有故亭卽郡國志所謂長門亭也史記云霸漑
長水也雖不在祠典以近咸陽秦漢都漑渭長水
蓋得比大川之禮昔文帝居霸陵北臨厠指新
路示慎夫人曰此走邯鄲道也因使慎夫人鼓瑟
上自倚瑟而歌悽愴悲懷顧謂羣臣曰以北山石
爲郭用紵絮斲陳漆其間豈可動哉釋之曰使其

中有可欲雖錮南山猶有隙使無可欲雖無石郭
又何戚焉文帝曰善拜廷尉韋昭曰高嶰夾水爲
厠今斯原夾二水也尉門其內有長安尉官在裏
故城曰尉門也如淳曰今名廣門也第三門本名
杜門亦曰利城門王莽更名進和門臨水亭其水
有客舍故處曰客舍門又曰洛門也凡此諸門皆
通達九達三途洞開隱以金堆周以林木左出右
入爲徒之經行者升降有上下之別漢成帝之爲
太子元帝嘗急召之太子出龍樓門不敢絕馳道
西至直城門方乃得度上怪遲問其故以狀對上

悅乃著令令太子得絕馳道也渭水東合昆明故
渠渠上承昆明池東口東逕河池北亦曰女觀陂
又東合沈水亦曰漕渠又東逕長安縣南東逕明
堂南舊引水爲辟雍處在縣鼎路門東南七里其
觀上圓下方九宮十二室四嚮五色堂北三百步
有靈臺是漢平帝永始四年立渠南有漢故圓丘
成帝建始二年罷雍五時始祀皇天上帝於長安
南郊應劭曰天郊在長安南卽此也故渠之北有
白亭博望苑漢武帝爲太子立使通賓客從所好
也太子巫蠱事發所杜門東出史良娣死葬於苑

北宣帝以爲辰園以倡優千人樂思后園廟故亦曰于鄉故渠又東而北屈逕青門外與沈水枝渠會渠上承沈水於章門西飛渠引水入城東爲倉池池在未央宮西池中有漸臺漢兵起王莽死於此臺又東逕未央宮北高祖在關東令蕭何成未央宮何斬龍首山而營之山長六十餘里頭於渭尾達樊川頭高二十丈尾漸下高五六丈土色赤而堅云昔有黑龍從南山出飲渭水其行道因山成跡山卽基闕不假築高出長安城北有玄武闕卽北闕也東有蒼龍闕闕內有閭闔公車諸門未

央殿東有宣室玉堂騏驎含章白虎鳳皇朱雀鸞鸞昭陽諸殿天祿石渠騏驎三閣未央宮北卽桂宮也周十餘里內有明光殿走狗臺栢梁臺舊乘復道用相逕通故張衡西京賦曰鈞陳之外閣有窈隆長樂與明光逕北通于桂宮故渠出二宮之間謂之明渠也又東歷武庫北舊樗里子葬於此樗里子名疾秦惠牽異母弟也滑稽多智秦人號曰智囊寔於昭王廟西渭南陰鄉樗里故俗謂之樗里子也我百歲後是有天子之宮夾我墓疾以昭王七年卒葬于渭南章臺東至漢長樂宮在其

東未央宮在其西武庫直其墓秦人嘜曰力則任
鄙智則樗里子也明渠又東逕漢高祖長樂宮北
本秦之長樂宮也周二十里殿前列銅人殿西有
長信長秋永壽永昌諸殿殿之東北有池池北有
層臺俗謂是池爲酒池非也故渠北有樓漢京兆
尹司馬文預碑故渠又東出城分爲二渠卽漢書
所謂王渠者也蘇林曰王宮家渠也猶今御溝矣
晉灼曰渠名也在城東霸門外一水逕楊橋下卽
青門橋也側城北逕鄧艾祠西而北注渭余無水
其一渠東逕奉明縣廣城鄉之廣明苑南史皇孫

及王夫人葬於郭北宣帝遷苑南史王孫及王夫
人卜以爲悼園益園民千六百家立奉明縣以奉
二園園在東都門昌邑王賀自霸御法駕郎中令
龔遂驂乘至廣明東都門是也故渠東北逕漢太
尉夏侯嬰冢西葬日柩馬悲鳴輕車罔進下得石
槨銘云于嗟滕公居此室故遂葬焉冢在城東八
里飲馬橋南四里故時人謂之馬冢霸水又北會
兩川又北故源左出焉霸水又北逕王莽九廟南
王莽地皇元年博徵天下工匠壞撤西苑建章諸
宮館十餘所取材瓦以起九廟竿及吏民以義入

四字誤粘在此册行

錢穀助成九廟廟殿皆重屋太初祖廟東西南北各四十丈高十七丈餘廟半之為銅薄櫨飾以金銀雕文窮極百工之巧禡高增下功費數百巨萬卒灰者萬數霸水又北逕枳道在長安縣東十三里王莽九廟在其南漢世有白鷺羣飛自東都門過于枳道呂后祓除於霸上還見倉狗戟脅於斯道也水上有橋謂之霸橋地皇三年霸橋木災自東起卒數千以水汎沃救不滅晨熿夕盡王莽惡之下書曰霸火橋乙未立春之日也予以神明三年終冬絕滅霸駁之橋欲以興成新室統一長

存之道其名霸為長存橋霸水之北左納漕渠絕霸右出焉東逕霸城北又東逕子楚陵北皇甫謐曰秦莊王葬于芒蕩之麗山京兆東南霸陵山劉向曰莊王大其名立墳者也戰國策曰莊王字異人更名子楚故世人猶以子楚名陵又東逕新豐縣右會故渠上承霸水東北逕霸縣故城南漢文帝之霸陵漢縣也王莽更之曰水葦魏文帝黃初元年徙長安金狄重不可致因留霸城南人有見薊子訓與父老共摩銅人曰正見鑄此時計壽日似近五百年矣故渠又東北逕劉更始塚西更始

二年爲赤眉所殺故謂侍中劉恭夜往取而埋之
光武使司徒鄧禹收葬於霸陵縣更始尚書僕射
行大將軍事鮑永持節安集河東聞更始歿歸世
祖累遷司隸校尉行縣逕更始墓遂下拜哭盡哀
而去帝問公卿太中大夫張湛曰仁不遺舊忠不
忘君行之高者帝乃釋又東北逕新豐縣又合漕
渠漢大司農鄭當時所開也以渭難漕命齊水工
徐伯乃發卒穿渠引渭今源自昆明池南傍山原
東至于河且且漕大以爲便今霸水又北逕秦
虎圈東列士傳曰秦昭王會魏王魏王不行使朱

亥奉璧一雙秦王大怒置朱亥虎圈中亥瞋目視
虎皆裂血出濺虎虎不敢動卽是處也霸水又北
入于渭水渭水又東會成國故渠渠魏尚書左僕
射衛臻征蜀所開也號成國渠引以澆故田其瀆
上承汧水於陳倉東東逕郿及武功槐里縣北渠
左有安定梁嚴冢碑碣尚存逕漢武帝茂陵南故
槐里之茂鄉也應劭曰武帝與自爲陵在長安西
北八十餘里漢武帝故事曰帝崩後見形謂陵令
薛平曰吾雖失勢猶爲汝君奈何令吏卒上吾陵
磨刀劒乎自今已後可禁之平頓首謝因不見推

問陵傍果有方石可以爲礪吏卒常盜磨刀劔霍
光欲斬之張安世曰神道茫昧不宜爲法乃止故
阮公詠懷詩曰失勢在須臾帶劍上吾丘陵之南
故渠又北分爲二渠東逕虎圈南而東入霸一水
北合渭今無水

東入于河

春秋之渭汭也左傳閔公三年虢公敗犬戎于渭
隊服虔曰隊謂汭也杜預曰水之隈曲曰汭王肅
云汭入也呂忱云汭者水相入也水會卽船司空
所在矣地理志曰渭水東至船司空入河服虔曰

縣名都官二輔黃圖有船庫官後改爲縣王莽之
船利者也

水經第十九

三月十七日校

水經第二十

漾水

丹水

漢 桑 欽 撰

後魏 酈 道 元 注

明 吳 瑄 校

漾水出隴西氐道縣蟠冢山東至武都沮縣為漢水
常璩華陽國記曰漢水有二源東源出武都氐道
縣漾山為漾水禹貢導漾東流為漢是也西原出
隴西蟠冢山會泉逕葭萌入漢始源曰沔按沔水
出東狼谷逕沮縣入漢漢中記曰蟠冢以東水皆

東流蟠冢以西水皆西流卽其地勢源流所歸故俗以蟠冢爲分水嶺卽此推沔水無西入之理劉澄之二云有水從沔陽縣南至梓潼漢壽入大穴暗通罌山郭景純亦言是矣罌山穴小本不容水水成大澤而流與漢合庾仲邕又言漢水自武遂川南入蔓葛谷越野牛逕至開城合西漢水故諸言漢者多言西漢水至葭萌入漢又曰始源曰沔是以經云漾水出氐道縣東至沮縣爲漢水東南至廣魏白水診其泂注似與三說相符而未極西漢之源矣然東西兩川俱受沔漢之名者議或在茲

矣班固地理志曰司馬彪袁崧郡國志並言漢有二源東出氐道西出西縣之蟠冢山闕駟云漢或爲漾漾水出崑崙西北隅至氐道重源顯發而爲漾水又言隴西縣蟠冢山在西西漢水所出南入廣魏白水又云漾水出獮道東至武都入漢許慎呂忱並言漾水出隴西獮道東至武都爲漢水不言氐道然獮道在冀之西北又隔諸川無水南入疑出獮道之爲謬矣又云漢漾也東爲滄浪水山海經曰蟠冢之山漢水出焉而東南流注于江然東西兩川俱出蟠冢而同爲漢水者也孔安國曰

泉始出爲漾其猶濛耳而常璩專爲漾山漾水當是作者附而爲山水之殊目矣余按山海經漾水出崑崙西北隅而南流注于配塗之水穆天子傳曰天子自春山西征至于赤烏氏己卯北征庚辰濟于洋水辛巳入于曹奴之人戲觴天子于洋水上乃獻良馬九百牛羊七千天子使逢固受之天子乃賜之黃金之鹿戲乃膜拜而受余以太和中從高祖北巡狄人猶有此獻雖古今世殊而所貢不異然川流隱伏卒難詳照地理潛閎變通無方復不可全言闕氏之非也雖洋流派別枝渠勢懸

原始要終潛流或一故俱受漢漾之名納方士之稱是其有漢川漢陽廣漢漢壽之號或因其始或據其終縱異名互見猶爲漢漾矣川共目殊或亦在斯今西縣嶓冢山西漢水所導也然微涓細注若通翼歷津注而已西流與馬池水合水出上邽西南六十餘里謂之龍淵水言神馬出水事同徐吾來淵之異故因名焉開山圖曰隴西神馬山有淵池龍馬所生卽是水也其水西流謂之馬池川又西流入西漢水西漢水又西南流左得蘭渠溪水次西有山黎谷水次西有鐵谷水次西有石耽

水經 卷之二十一
谷水次西有南谷水並出南山揚湍北注右得高
望谷水次西得西溪水次西得黃花谷水咸出北
山飛波南入西漢水又西南資水注之水北出資
川導源四壑南至資峽總爲一水出峽西南流注
西漢水西漢水又西南得峽石水口水出苑亭曰
草里谷三溪西南至峽石口合爲一瀆東南流屈
而南注西漢水西漢水又西南合陽廉川水水出
西谷衆川瀉流合成一川東南流逕南縣故城北
秦莊公伐西戎破之周宣王與其大略大丘之地
爲西垂大夫亦西垂官也王莽之西治矣建武八

年世祖至陽河竇融等悉會天水震動隗躡將妻
子奔西城從楊廣廣死躡孤窮城守時潁川賊起
車駕東歸留吳漢岑彭圍躡岑等壅西谷水以縑
幔盛土爲堤灌城城未沒丈餘水穿壅不行地中
數丈涌出故城不壞請蜀救至漢等退上邽但廣
廉字相狀後人因以人名名之故習僞爲楊廉也
置楊廉縣焉又東南流右會茅川水水出西南戎溪
東北流逕戎丘城南吳漢之圍西城王捷登城向
漢軍曰爲隗王城守者皆必死無二心願諸將亟
罷請自殺以明之遂刎頸而死又東北流注西谷

水亂流東南入于西漢水西漢水又西南逕始昌
峽始昌縣故城西晉書地道記曰天水始昌縣故
城西也亦曰清崖峽西漢水又西南逕巖備戍南
左則巖備水自東南西北注之右則鹽官水南入
焉水有鹽官在嶠冢西五十許里相承營煮不輟
味與海鹽同故地理志云西縣有鹽官是也其水
東南逕巖備戍西東南入漢水漢水又西南合左谷
水水出南山窮溪北注漢水又西南蘭軍水出於
西北至交谷東南歷郊山軍東南入漢水漢水又
西南逕祁山軍南雞水出南雞谷北逕水南縣西

北流注于漢漢水又西建安川水入焉其水道源
建威西北山白石戍東南二源水合注東逕建威
城南又東與蘭坑水會水出西南近溪東北逕蘭
坑城西東北注建安水建安水又東逕蘭坑城北
建安城南其地故西縣之歷城也楊定自隴右徙
治歷城卽此處也去仇池一百二十里後改爲建
安城其水又東合錯水水出錯水戍東南而東北
入建安水建安水又東北有雉尾谷水又東北有
太谷水又北有小祁山水並出東溪揚波西注又
北左會胡谷水水西出胡谷東逕金盤歷城二軍

北軍在水南層山上其水又東注建安水建安水
又東北逕塞峽元嘉十九年宋太祖遣龍驤將軍
裴方明伐楊難當將妻子北奔安西叅將魯尚期
追出塞峽卽是峽矣左山側有石穴洞入言潛通
下辨所未詳也其水出峽西北流注漢水漢水北
連山秀舉羅峯兢峙祁山在蟠塚之西七十里罡
山上有城極爲巖固昔諸葛亮攻祁山卽斯城也
漢水逕其南城南三里有亮故壘壘之左右猶豐
茂宿草蓋亮所植也在上邽西南二百四十里開
山圖曰漢陽西南有祁山溪徑逶迤山高巖嶮九

州之名岨天下之奇峻今此山於衆阜之中亦非
爲傑矣漢水又西南與申谷水合水出西南申谷
東北流注漢水漢水又西逕南岸北中岸之上下
有二城相對左右墳壠低昂亘山被阜古語云南
岸北岸萬有餘家諸葛亮表言祁山縣出租五百
有民萬戶矚其丘墟信爲殷矣漢水西南逕武植
戍南武植戍水發北山二源奇發合于安民戍南
又南逕武植戍西而西南流注漢水漢水又西南
逕平夷戍南又西南夷水注之水出北山南逕其
戍西南入漢水漢水又西逕蘭倉城南又南右會

兩溪俱出西山東流注于漢水張華博物志云溫水出鳥鼠山下注漢水疑是此水而非所詳也漢水又南入嘉陵道而爲嘉陵水然世俗名之爲皆陵水非也漢水又東南右得北谷水東南得城階水又東南得倉谷水右三水並出西溪東流注漢水漢水又東南逕瞿堆西又屈逕瞿堆南絕壁峭峙孤嶮雲高望之形若覆壺其高二十餘里羊腸蟠道三十六迴開山圖謂之仇夷所謂積石嵯峨嶽岑隱阿者也有平田百頃煮土成鹽因以百頃爲號山上豐水泉所謂清泉湧沸潤氣上流者

也漢武帝元鼎六年開以爲武都郡天池大澤在西故都爲目矣王莽更名樂平郡縣曰循虜縣常璩范曄云郡居河池一名仇池池方百頃卽指此也左右悉白馬氏矣漢獻帝建安中有天水氏楊勝者世居隴右爲氏太師子駒勇健多計徙居仇池魏拜爲百頃氏王漢水又東合洛谷谷有二源合同注一壑於神蛇戍西左右山溪多五色蛇性馴良不爲物毒洛谷水又南逕虎馘戍東又南逕仇池郡西瞿堆東西南入漢水漢水又東合洛漢水水北發洛谷南逕威武戍南又西南與龍門水

合水出西北龍門谷東流與橫水會東北窮溪卽
水源也又南逕龍門戍東又東南入洛漢水又東
南逕上祿縣故城西脩源濬導逕引北溪南總兩
川單流納漢漢水又東南逕濁水城南又東南會
平樂水水出武階東北四十五里更馳南溪導東
北源流山側有甘泉涌波飛流下注平洛水又逕
甘泉戍南又東逕平洛戍南又東入漢謂之會口
漢水東南逕脩城道南與脩水合水總二源東北
合漢漢水又東南於槃頭郡南與溜水合水出濁
城北東流與丁令溪水會其水北出丁令谷南逕

武街城西東南入濁水濁水又東逕武街城南故
下辨縣治也李倉李稚以氏王楊敵堅妻歿葬陰
平襲武街爲氏所殺於此矣今廣業郡治濁水又
東宏體水注之水北出溪南逕武街城東而南流
注于濁水濁水又東逕白石縣南續漢書曰虞詡
爲武都太守下辨東三十餘里有峽峽中白水生
大石障塞水流春夏輒潰溢敗壞城郭詡使燒石
以水灌之石皆碎裂因鑄去焉遂無泛溢之害濁
水卽白水之異名也濁水又東南渥陽水北出渥
谷南逕白石縣東而南入濁水濁水又東南與仇

鳩水合水發鳩溪南逕河池縣故城西王莽之樂平亭也其水西南流注濁水濁水又東南與河池水合水出河池北谷南逕河池戍東西南入濁水濁水東南兩當水注之水出陳倉縣之大散嶺西南流入故道川謂之故道水西南逕故道城東魏征仇池築以置戍與馬鞍山水合水東出馬鞍山歷谷西流至故道城東西入故道水西南流北川水注之水出北洛嶺山南南流逕唐倉城下南至困冢川入故道水故道水又西南歷廣香交合廣香川水水出南田縣利喬山南流至廣香川謂廣

香川水又南注故道水謂之廣香交故道水又西南入秦岡山尚婆水注之山高入雲遠望增狀若嶺紆曦軒峯駐月駕矣懸崖之側列壁之上有神象若圖指狀婦人之容其形上赤下白世名之曰聖女神至於福應愆違方俗是祈水源北出利喬山南逕尚婆川謂之尚婆水歷兩當縣之尚婆城南魏故道郡治也西南至山入故道水故道水右又合黃盧山水水出西北天水郡黃盧山腹歷谷南流交注故道水故道水南入東益州之廣業郡界與沮水枝津合謂之兩當溪水上承武都沮縣

之沮水瀆西南流注于兩當溪虞詡爲郡漕穀布
在沮從沮縣至下辨山道嶮絕水中多石舟車不
通驢馬負運僦五致一詡乃於沮受僦直約自致
之卽將吏民按行皆燒石櫛木開漕船道水運通
利歲省萬計以其僦廩與吏士年四十餘萬也又
西南注于濁水濁水南逕槃頭郡東而南合鳳溪
水水上承濁水於廣業郡南逕鳳溪中有二石雙
高其形若闕漢世有鳳凰至故謂之鳳凰臺北去
郡三里水出臺下東南流左注濁水濁水又南注
漢水漢水又東南歷漢曲逕挾崖與挾崖水合水

西出檐潭交東流入漢水漢水又東逕武興城南
又東南與北谷水合水出武興東北而西南逕武
興城北謂之北谷水南轉逕其城東而南與一水
合水出東溪西流注北谷水又南流注漢水漢水
又西南逕關城北除水出西北除漢東南流入于
漢漢水又西南逕通谷通谷水出東北通溪上承
漾水西南流爲西漢水漢水又西南寒水注之水
東出寒川西流入漢漢水又西逕石亭戍廣平水
西出百頃川東南流注漢又有平阿水東山西流
注漢水漢水又逕晉壽城西而南合漢壽水水源

水經 卷之二十一
出東山西逕東晉壽故城南而西南入于漢水也
又東南至廣魏白水縣西又東南至葭萌縣東北與
羌水合

白水西北出于臨洮縣西南西傾山水色白濁東
南流與黑水合水出羌中西南逕黑水城西又西
南入白水白水又東逕洛和城南洛和水西南出
和溪東北流逕南黑水城西而北注白水白水又
東南逕鄧至城南又東南與大夷祝水合水出夷
祝城西南而窮溪北注夷水又東北合羊洪水出
東南羊溪西北逕夷祝城東又西北流屈而東北

注于夷水夷水又東北入白水白水又東與安昌
水會水源發衛大西溪東南逕鄧至安昌郡南又
東南合無累水無累水出東北近溪西南入安昌
水安昌水又東南入白水白水又東南入陰平得
東維水水出西北維谷東南逕維城西東南入白
水白水又東南逕陰平故城南王莽更名推虜矣
卽廣漢之北部也廣漢屬國都尉治漢平帝永初
三年分廣漢蠻夷置有白馬水出長松縣西南而
白馬漢東北逕長松縣北而東北注白水白水又
東逕陰平大城北蓋其渠帥自故城徙居也白水

又東偃庶水出西南偃溪東北流逕偃城西而東北流入白水白水又東逕偃城北又東北逕橋頭昔姜維之將還蜀也雒州刺史諸葛緒邀之於此後期不及故維得保劔閣而鍾會不能入也白水又與羌水合自下羌水又得其通稱矣白水又東逕郭公城南昔郭淮之攻寥化於陰平也築之故因名焉白水又東雒川水出西南雒漢東北注白水白水又東合空冷水傍溪西南窮谷卽川源也白水又東南與南五部水會水有二源西源出五部溪東南流東源出郎谷西南合南注白水白水

又東南逕建陽郡東而北與一水合二源同注共成三溪西南流入于白水白水又東南逕白水縣故城東卽白水郡治也經云漢水出其西非也白水又東南與西谷水相得水出西溪東流逕白水城南東南入白水白水又南左會東流水東入極溪便卽水源也白水又南逕興城東又東南左得刺稽水口溪東北出便水源矣白水又東南清水左注之庾仲雛曰清水自邪山來合白水斯爲孟浪也水出於平武郡東北矚累亘下南逕平武城東屈逕其城南又西歷平洛郡東南屈而南逕南

陽僑郡東北又東北逕新巴縣東北又東南逕始平僑郡南又東南逕小劔戍北西去大劔三十里連山絕嶮飛閣涌衢故謂之劔閣也張載銘曰一人守嶮萬夫趨趨信然故李特至劔閣而歎曰劉氏有如此地而面縛於人豈不奴才也小劔水西南出劔谷東北流逕其戍下入清水清水又東南注白水白水又東南於吐費城南卽西晉壽之東北也東南流注漢水西晉壽卽蜀王弟葭萌所封爲苴侯邑故遂城爲葭萌矣劉備改曰漢壽太康中又曰晉壽水有津關段元章善風角弟子歸元

章封筒藥授之曰路有急難開之生到葭萌從者與津吏諍打傷其破頭者可以此藥裹之生乃歎服還卒業焉亦廉叔度抱父柩自沈處也

又東南過巴郡閬中縣

巴西郡治也劉璋之分三巴此其一焉闕駟曰強水出陰平西北強山一曰強川姜維之還也鄧艾遣天水太守王頌敗于強川卽是也其水東北逕武都陰平梓潼南安入漢水漢水又東南逕津渠戍東又南逕閬中縣東閬水出閬陽縣而東逕其縣南又東注漢水昔劉璋之攻霍峻於葭萌也自

此水上張達范強害張飛於此縣漢水又東南得東水口水出巴嶺南歷獠中謂之東遊水李壽之時獠自牂牁北入所在諸郡布在山谷其水西南逕宋熙郡東又東南逕平城東又東南逕巴西郡東又東入漢水漢水又東與濩溪水合水出獠中世亦謂之爲清水也東南流注漢水漢水又東南逕宕渠縣東又東南合宕渠水水西北出鄭縣南巴嶺與槃余水同源派注南流謂之北水東南流與難水合水出東北巴山西南注之又東南流逕宕渠縣謂之宕渠水又東南入漢

又東南入漢州江津縣東南入于江涪水注之故仲雍謂涪內水者也

丹水出京兆上洛縣西北冢嶺山

名高猪山也丹水東南流與清池水合水源東北出清池山西南流入于丹水

東南過其縣南

縣故蜀京兆晉分爲郡地通記曰郡在洛上故以爲名竹書紀年晉烈公三年楚人伐我南鄙至于上洛楚水注之楚水出上洛縣西南楚山昔四皓隱于楚山卽此山也其水兩源合舍於四皓廟東

又東逕高車嶺南翼帶衆流北轉入丹嶺上有四皓廟丹水自倉野又東歷兔和山卽春秋所謂左師軍於兔和右師軍於倉野者也

又東南過商縣南又東南至于丹水縣入于洧

契始封商魯連子曰在太華之陽皇甫謐闕駟並以爲上洛商縣也殷湯之名起於此矣丹水自商縣東南流注歷少習出武關應劭曰秦之南關也通南陽郡春秋左傳哀公四年楚左司馬使謂陰地之命大夫士蔑曰晉楚之盟好惡同之不然將通於少習以聽命者也京相璠曰楚通上洛阨道

也漢祖下浙酈攻武關文潁曰武關右浙縣西一百七十里弘農界也丹水又東南流入曰口歷其戍下又東南浙水出浙縣西北弘農盧氏縣大嵩山南流逕脩陽縣故城北縣卽浙之北鄉也又東入浙縣統結成潭謂之龍淵清深神異者舊傳云漢祖入關逕觀是潭其下若有府舍焉事旣非恒難以詳矣其水又東逕其縣故城北蓋春秋之白羽也左傳昭公十八年楚使王子勝遷許於浙是也郭仲產云相承言此城漢高所築非也余按史楚襄王元年秦出武關斬衆五萬取浙一十五城

漢祖入關亦言下浙酈非無城之言循之則可矣
浙水又歷其縣東王莽更名縣爲古亭也而南流
入丹水縣注于丹水故丹水會洑有浙口之稱丹
水又東南逕一故城南名曰三戶城昔漢祖入關
王陵起兵丹水以歸漢祖此城疑陵所築也丹水
又逕丹水縣故城西南縣有密陽鄉古商密之地
昔楚申息之師所戍也春秋之三戶矣杜預曰縣
北有三戶亭竹書紀年曰士寅孫何侵楚入三戶
郭者是也水出丹魚先夏至十日夜伺之魚水郭
側赤光上照如火網而取之割其血以塗足可以

步行水上長居淵中丹水東南流至其縣南黃水
出北予山黃谷南逕丹水縣南注于丹水黃水北
有墨山山石悉黑績彩奮發黝焉若墨故謂之墨
山今河南新安縣有石墨山斯其類也丹水南有
丹崖山山悉頰壁霞舉若紅雲秀天二岫更爲殊
觀矣丹水又南逕南鄉縣故城東北漢建安中割
南陽石壤爲南鄉郡逮晉封宣帝孫暢爲順陽王
因爲立順陽郡而南鄉爲縣舊治鄴城永嘉中丹
川浸沒至永和中徙治南鄉故城城南門外舊有
郡社栢樹大三十圍蕭欣爲郡伐之言有大蛇從

樹腹中墜下大數圍長三丈羣小蛇數十隨入南山聲如風雨伐樹之前見夢於欣欣不以厝意及伐之吏少日果死丹水又東逕南鄉縣北興寧末太守王靡之改築今城城北半據在水中左右夾溪深長及春夏水漲望若孤洲矣城前有晉順陽太守丁穆碑郡民范寧立之丹水逕流兩縣之間歷於中之北所謂商於者也故張儀說楚絕齊許以商於之地六百里謂以此矣呂氏春秋曰堯有丹水之戰以服南蠻卽此水也又南合洧水謂之浙水

水經第二十

水經第二十一

漢 桑 欽撰

後魏 酈道元注

明 吳 瑄校

汝水

汝水出河南梁縣勉鄉西天息山

地理志曰出高陵山卽猛山也亦言出南陽魯陽縣之大孟山又言出弘農盧氏縣還歸山博物志曰汝出燕泉山並異名也余以永平中蒙除魯陽太守會上臺下列山川圖以方志參差遂令尋其

源流此等既非學徒難以取悉既在邁見不容不
述今汝水西出魯陽縣之大孟山黃柏谷巖鄣溪
高山岫邃密石徑崎嶇人跡裁交西卽盧氏界也
其水東北流逕太和城西又東流逕其城北左右
溪松列植筠柏交蔭尹公度之所棲神處也又東
屆堯山西嶺下水流兩分一水東逕堯山南爲滢
水也卽經所言滢水出堯山矣一水東北出爲汝
水歷蒙柏谷左右岫壑爭溪山阜競高夾水層松
茂柏傾山蔭渚故世人以名也津流不已北歷長
白沙口狐白谿水注之夾岸沙漲若雪因以取名
者也

東南過其縣北

汝水自狼臯山東出峽謂之汝阨也東歷麻解城
北故鄆鄉城也謂之蠻中左傳所謂單浮餘圍蠻
氏蠻氏潰者也杜預曰城在河南新城縣之東南
伊洛之戎陸渾蠻氏城也俗以爲麻解城非也蓋
蠻麻讀聲近故也汝水又逕周平城南京相璠曰
霍陽山在周平城東南者也汝水又東與三屯谷
水合水出南山北流逕石碣東柱側刊云河南界

又有一碣題言洛陽南界碑柱相對既無年月竟不知何代所表也其水又北流注于汝水汝水又東與廣成澤水合水出狼臯山北澤中安帝永初元年以廣成遊獵地假與貧民元初二年鄧太后臨朝鄧騭兄弟輔政世士以爲文德可興武功宜廢寢蒐狩之禮息戰陣之法于時馬融以文武之道聖賢不墜五才之用無或可廢作廣成頌云大漢之初基也揆厥靈囿營于南郊右轡三塗左枕嵩嶽而據衡陰背箕王屋浸以波澹演以滎洛金山石林殷起乎其中神泉側出丹水湟池怪石浮

磬燿焜于其陂栢帝延熹元年校獵廣成遂幸函谷關其水自澤東南流逕溫泉南與溫泉水合溫水殷源揚波於川左泉上華宇連蔭茨薨交池石沼錯落其間順道者多歸之其水東南流注廣成澤水澤水又東南入于汝水汝水又東得魯公水口水上承陽人城東魯公陂城古梁之陽人聚也秦滅東周徙其君於此陂水東南流合乎澗水水出北山南流注之又亂流注于汝水汝水之右有霍陽聚汝水逕其北東合霍陽山水水出南山杜預曰河南梁縣有靈山者也其水東北流逕霍陽

聚東世謂之華浮城非也春秋左傳哀公四年楚
侵梁及霍服虔曰梁霍周南鄙也建武二年世祖
遣征虜將軍祭遵攻蠻中山賊張滿時厭新柏率
餘賊合攻得霍陽聚卽此水又逕梁城西按春秋
周小邑也於戰國爲南梁矣故經云汝水逕其縣
北俗謂之治城也非以北有注城故也今置治城
縣治霍陽山水又東北流注于汝水汝水又右合
三里水水北出梁縣西北而東南流逕其縣故城
西故單孤聚也地理志云秦滅西周從其君於此
因乃縣之杜預曰河南縣西南有梁城卽是縣也

水又東南逕注城南司馬彪曰河南梁縣有注城
史記魏文侯三十二年敗秦于注者也又與一水
合水發注城東坂下東南流注三里水三里水又
亂流入于汝汝水又東逕成安縣故城北按地理
志潁川郡有成安縣侯國也史記建元以來功臣
侯者年表曰漢武帝元朔五年校尉韓千秋擊南
城歿封其子韓延年爲成安侯卽此邑矣世謂之
白泉城非也俗謬耳汝水又東爲周公渡藉承休
之徽號而有周公之嘉稱也汝水又東黃水注之
水出梁山東南逕周承休縣故城東爲承休水縣

故子南國也漢武帝元鼎四年幸雒陽巡省豫州
觀于周室邈而無祀詢問耆老乃得孽子嘉封爲
周子南君以奉周祀按汲冢古文謂衛將軍文子
爲子南稱矣其後有子南勁紀年勁期于衛後惠
成王如衛命子南爲侯秦并六國衛最後滅疑嘉
是衛後故氏子南而稱君也初元五年爲周承休
邑地理志曰侯國也元帝置元始二年更曰鄭公
王莽之嘉萇也故汝渡有周公之名蓋藉邑以納
稱也謂之黃城水曰黃水皆非也其水又東南逕
白茅臺東又南逕梁瞿鄉西世謂之期城非也按

漢書世祖自潁川徃梁瞿鄉馮魴先詣行所卽是
邑也水積爲陂世謂之黃陂東轉逕其城南東流
右合汝水

又東南潁川邾縣南

汝水又東與張磨泉合水發北阜春夏水盛則南
注汝水汝水又東分爲西長湖湖水南北五十餘
步東西三百步汝水又東扈澗水北出大劉山南
逕水蓼堆東邾城西南流入于汝汝水又右迤爲
湖湖水南北八九十步東西四五百步俗謂之東
長湖湖水下入汝古養水也水出魯陽縣北將孤

山北長岡下數泉俱發東歷永仁三堆南又東逕沙川世謂之沙水歷山符壘北又東逕沙亭南故養陰里也司馬彪郡國志曰襄城有養陰里京相璠曰在襄城郟縣西南養水名也俗以是水爲沙水故亦名之爲沙城非也又城處水之陽而以陰爲稱更用惑焉但流襍閒居梨漑平移致令川渠異容津途狀改故物望疑焉又右會董溝水水出沛公壘西六十許步蓋漢祖入關往征是由故地擅斯目矣其水東北注養養水又東北入東長廸湖亂注汝水縣汝水又逕郟縣故城南春秋昭公

十九年楚令尹子瑕之所城也激水注之水出魯陽縣之將孤山東南流許慎云水出南魯陽入父城從水敖聲呂忱字林亦言在魯陽激水東入父城縣與柏水會柏水出魯陽北山水有二源竒導於賈復城合爲一瀆逕賈復城北復南擊郟所築也俗語訛謬謂之寡婦城水曰寡婦水北瀆水有窮通故有枯渠之稱焉其水東北流至父城縣北右注激水亂流又東北至郟入汝汝水東南左合藍水水出陽翟縣重嶺山東南流逕紀氏城西有增臺記紀氏臺續漢書曰世祖車駕西征盜賊羣

起邾令馮魴爲賊延裒所攻力屈上詣紀氏羣賊
自降卽是處在邾城東北十餘里其水又東南流
逕黃阜東而南入汝水汝水又東南流又與白溝
水合水出亭城西而南逕夏亭城西又南逕龍城
西城西北卽摩陂也縱廣可一十五里魏青龍元
年有龍見于邾之摩陂明帝幸陂觀龍於是改摩
陂曰龍陂其城曰龍城其水又南入于汝水又東
南與龍山水會水出龍山龍谿北流際父城縣故
城東昔楚平王大城城父以居太子建故杜預曰
卽襄城之城父縣也馮異據之以降世祖用報巾

車之恩也其水又東北流與二水合俱出龍山北
流注之又東北入于汝水汝水又東南逕襄城縣
故城南王隱晉書地道記曰楚靈王築劉向說苑
曰襄城君始封之日服翠衣帶玉佩徙倚於流水
之上卽是水也楚大夫莊辛所說處後乃縣之呂
后元年立孝惠後宮子義爲侯國王莽更名相成
也黃帝嘗遇牧童於其野故嵇叔夜讚曰奇矣難
測襄城小童倦遊六合來憇茲邦也其城南對汜
城周襄王出鄭居汜卽是城地也春秋襄公二十
六年楚伐鄭涉汜而歸杜預曰涉汝水於汜城下

也晉襄城郡治京相璠曰周襄王居之故曰襄城也今置關於其下汝水又東南流逕西不羹城南春秋左傳昭公十二年楚靈王曰昔諸侯遠我而畏晉今我大城陳蔡不羹賦皆千乘諸侯其畏我乎東觀漢記曰車騎馬防以前參藥勤勞省闈增封侯國襄城羹亭千二百五十戶卽此亭也汝水又東南逕繁丘城南而東南出也

又東南過定陵縣北

湛水出犇縣北魚齒山西北東南流歷魚齒山下爲湛浦方五十餘步春秋襄公十六年晉伐楚報

楊梁之役楚公子格及晉師戰于湛阪楚師敗績遂侵方城之外今水北悉枕翼山阜於父城東南湛水之北山有長陂蓋卽湛水以名陂故有湛陂之名也湛水又東南逕蒲城北京相璠曰昆陽縣北有蒲城蒲城北有湛水者是也漢水又東於汝水九曲北東入汝杜預亦以是水爲湛水矣周禮荊州其浸潁湛鄭玄云未聞蓋偶有不照也今考地則不乖其土言水則有符經文矣汝水又東南逕定陵縣故城北漢成帝元延三年封侍中衛尉淳于長爲侯國王莽更之定城矣東觀漢記曰光

武擊王莽二公還到汝水上於涯以手飲水澡頰
塵垢謂傳俊曰今日疲倦諸君寧憊也卽是水也
水右則滢水左入焉左則百尺溝出矣溝水夾岸
層崇亦謂之爲百尺隄也自定陵城北通潁水於
襄城縣潁盛則南播汝佚則北注溝之東有澄潭
號曰龍淵在汝北四里許南北百步東西二百步
水至清溪嘗不耗竭佳饒魚笱湖溢則東注滎水
矣汝水又東南昆水注之水出魯陽縣唐山東南
流逕昆陽縣故城西更始元年王莽徵天下能爲
兵法者選練武衛招募猛士旌旗輜重千里不絕

又驅諸獷獸虎豹犀象之屬以助威武自秦漢出
師之盛未嘗有也世祖以數千兵激之陽關諸將
見尋邑兵盛反走入昆陽世祖乃使成國上公王
鳳廷尉大將軍王常留守夜與十三騎出城南門
收兵於鄧尋邑圍城數千里雲車十餘丈瞰臨城
積弩亂發矢下如雨城中人負戶而汲王鳳請降
不許世祖帥營部俱進頻破之乘勝以敢歿三千
人徑衝尋邑兵敗其中堅於是水之上遂殺王尋
城中亦鼓譟而出中外合勢震呼動天地會大雷
風屋瓦皆飛莽兵大潰昆水又屈逕其城南世祖

建武中封侍中傅俊爲侯國故後漢郡國志有昆陽縣蓋藉水以氏縣也昆水又東逕定陵城南又東注汝水汝水又東南逕奇雒城西北今南潁川郡治也瀆水出焉世亦謂之大灑水爾雅曰河有雍汝有瀆然則瀆者汝別也故其下夾水之邑猶流汝陽之名是或瀆灑之聲相近矣亦或下合灑潁兼統厥稱耳

又東南過鄆縣北

汝水逕奇額城西東南流其城衿帶兩水側背雙流汝又東南流逕鄆縣故城北故魏下邑也史記

楚昭陽伐魏取鄆是也汝水又東得醴口水水出南陽雒山亦云導源雒衡山卽山海經云衡山也郭景純以爲南嶽非也馬融廣成頌曰面據衡陰指謂是山在雒縣界故世謂之雒衡山依山海經不言有水焉然醴水東流歷唐山下卽高鳳所隱之山也醴水又東南與臯水合水發臯山郭景純或作章山東流注于醴水醴水又東南逕唐城北南入城而西流出城城蓋因山以卽稱矣醴水又屈而東南流逕葉縣故城北春秋昭公十五年許遷于葉者也楚盛周衰控霸南土欲爭強中國多

築列城於北方以逼華夏故號此城爲萬城或作
方城唐勒奏土論曰我是楚也世霸南土自越以
至葉垂弘境萬里故號曰萬城也余按春秋屈完
之在邵陵對齊侯曰楚國方城以爲城杜預曰方
城山名也在葉南未詳孰是楚惠王以封諸梁子
號曰葉公城卽子高之故邑也葉公好龍神龍下
之河東王喬之爲葉令也每月望常自詣朝堂帝
怪其來數而不見車騎顯宗密令太史何望之言
其臨至輒有雙鳧從東南飛來於是候鳧至舉羅
張之但得一隻鳥乃詔尚方診視則四年中所賜

尚書官屬履也每當朝時葉門下鼓不擊自鳴聞
於京師後天下玉棺於堂前吏民推排終不搖動
喬曰天帝獨欲召我耶乃沐浴服飾寢其中蓋使
立覆宿昔葬於城東土自成墳其夕縣中牛皆流
汗喘乏而人無知者百姓爲立廟號葉君祠牧守
每班錄皆先謁拜之吏民祈禱無不如應若有違
犯亦立能爲祟帝乃迎取其鼓置都亭下略無復
聲焉或云卽古仙人王喬也是以于氏書之於神
化醴水又逕其城東與燒車水合水西出苦菜山
東流側葉城南而下注澧水澧水又東逕葉公廟

北廟前有公子高諸梁碑舊秦漢之世廟道有雙
闕几筵黃中之亂殘毀頽闕魏大和景初中令長
修飾舊宇後長汝南陳晞以正始元年立碑碑字
破落遺文殆存事見其碑醴水又東與葉西陂水
會縣南有方城山屈完所謂楚以方城以爲城者
也山有湧泉北流畜之以爲陂故塘方二里陂水
散流又東逕葉城南而東北注醴水醴水又東注
葉陂陂東西十里南北七里二陂並諸梁之所竭
也陂水又東逕濩陽縣故城北又東定陵城南東
與芹溝合其水導源葉縣東逕濩陽城北又東逕

定陵縣南入東南流注澧其水逕流昆醴之間纏
絡四縣之中疑卽呂忱所謂澆水也今於定陵更
無別水唯是水可當之澧水東逕鄧縣故城南左
入汝山海經曰澧水東流注于澆水也汝水又東
南流逕鄧城西春秋左傳桓公二年蔡侯鄭伯會
于鄧者也汝水又東南流濩水注之
又東南過汝南上蔡縣西

汝南郡楚之別也漢高帝四年置王莽改郡曰汝
濱縣故蔡國周武王剋殷封其弟叔度於蔡世本
曰上蔡也九江有下蔡故稱上竹書紀年曰魏章

率師及鄭師伐楚取上蔡者也建安元年安帝封
鄧騭爲侯國汝水又東逕玄瓠城北王智深云汝
南太守周矜起義於玄瓠者是矣今豫州刺史汝
南郡治城之西北汝水枝別左出西北流又屈西
東轉又西南會汝形若垂瓠耆彦云城北名焉灣
中有地數頃上有栗園栗小殊不並固安之實也
然歲貢三百石以充天府水渚卽栗州也樹木高
茂望若屯雲積氣矣林中有栗堂射埽甚閑敞牧
宰及英彥多所遊薄其城上西北隅高祖以太和
中幸懸瓠平南王肅起高臺於小城建層樓於隅

阿下際水竭降粟渚左右列榭四周參差競峙奇
爲嘉觀也

又東南過平輿縣南

一作平輿

溱水出浮石嶺北青衣山亦謂之表衣水也東南
逕朗陵縣故城西應劭曰西南有朗陵山縣以氏
焉世祖建武中封城門校尉成宮爲侯國也溱水
又南屈逕其縣南又東北逕北宜春縣故城北至
王莽更名之爲宣孱也豫章有宜春故加北矣永
元三年安帝封后父侍中閭暢爲侯國溱水又東
北逕馬香城北又東北入汝汝水又東南逕平輿

縣南安成縣故城北王莽更名至成也漢武帝元
光六年封長沙定王子劉蒼爲侯國矣汝水又東
南汶水注之水首受慎水於慎陽縣故城南陂陂
水兩分一水自陂北逕慎陽城四固城塹潁川荀
淑遇縣人黃叔度於逆旅與語移日曰子吾師表
也范曄論曰黃憲言論風旨無所傳聞然士君子
見之者靡不深服遠去疵吝將以道周性全無得
而稱乎塹水又自瀆東北流注七陂一水自陂東
北流積爲同陂陂水又東北又結而爲陂世謂之
窖陂陂水上承慎陽縣北陂東北流積而爲土陂

陂水又東爲窖陂陂水又東南流注壁陂陂水又
東北爲太陂陂水又東入汝汝水又東南逕平陵
亭北又東南逕陽遂鄉北汝水又東逕樂亭北春
秋之棘櫟也杜預曰汝陰新蔡縣東北有櫟亭今
城在新蔡故城西北半淪水汝水城北又東南逕
新蔡縣故城南昔管蔡間王室放蔡叔而遷之其
子胡能率德易行周公舉之爲魯卿士以見于王
三命之以蔡中呂地也以奉叔度祀是爲蔡仲矣
宋忠曰故名其地爲新蔡王莽所謂新遷者也世
祖建武元年封吳國爲侯國汝南先賢傳曰新蔡

鄭敬字次都爲郡功曹都尉高懿廳事前有槐樹
白露類甘露者懿問掾屬皆言是甘露敬獨曰明
府政未能致甘露但樹汁耳懿不悅託疾而去汝
水又東南左會潏水水上承汝水別流於奇頽城
東東南流爲練溝逕邵陂縣西東南流注至上蔡
西岡北爲黃陵陂陂東流於上蔡岡東爲蔡塘又
東逕平與縣故城南爲潏水縣舊沈國也有沈亭
春秋定公四年蔡滅沈以沈子嘉歸後以爲縣史
記曰秦將李信攻平與敗之者也建武三十年世
祖封姚統爲侯國于汝南郡治昔費長房爲市吏

見王壺公懸壺郡市長房從之因而自退同入此
壺隱淪仙路骨謝懷靈無會而返雖能役使鬼神
而終同物化城南里餘有神廟世謂之張明府祠
水旱之不節則禱之廟前有石碑文字紊碎不可
復尋碑側有小石函按信陽先賢畫讚臨武張熹
字季智爲平與令時天下大旱熹禱雩未獲應熹
乃積柴自焚主簿崇小史張化從熹焚焉俟火旣
燎天靈感應卽澍雨此熹自焚處也潏水又東南
左迤爲葛陂陂方數十里水物舍靈多所苞育昔
費長房投杖於陂而龍變所在也又劾東海君於

是陂矣陂水東出為鰲水俗謂之三丈陂亦曰三
 嚴水水逕銅陽縣故城南應劭曰縣在鰲水之陽
 漢明帝永平中封衛尉陰與子慶為侯國也縣有
 葛陵城建武十五年更名封經侯姚丹為侯國城
 之東北有楚武王冢民謂之楚王瑟城城北祝社
 里下土中得銅鼎銘曰楚武王是知武王塚也鰲
 陂東注為富水水積之處謂之陂塘津渠交絡枝
 布川隰矣澍水自葛陂東南逕新蔡縣故城東而
 東南流注于汝水又東南逕下桑里左迤為橫塘
 陂又東為北清陂者也汝水又東南逕壺丘城北

故陳也春秋左傳文公九年楚侵陳剋壺丘以其
 服于晉是也汝水又東與溝陂合水上承慎水於
 慎陽縣之上慎陂右溝北注馬城陂陂西有黃丘
 亭陂水於東逕新息亭北又東為綢陂陂水又東
 逕新息縣結為墻陂陂水又東逕遂鄉南東而為
 壁陂又東為青陂陂東對大呂亭春秋外傳曰當
 成周時南有荆蠻中呂姜姓矣蔡平侯始封也西
 南有小呂亭故此稱大也側陂南有青陂廟廟前
 有阪漢靈帝建寧三年新蔡長河南緱氏李言上
 請修復青陂司徒臣訓尚書臣襲秦可洛陽宮於

青陂東塘南樹碑碑稱青陂在縣坤地源起桐柏
淮川別流入于潺湲逕新息墻坡衍入襄信界灌
漑五百餘頃陂水又東分爲二水一水南入淮一
水東南逕白亭北又東逕吳城南史記楚惠王二
年子西召太子建之子勝於吳勝入居之故曰吳
城也又東北屈逕壺丘東而北流注于汝水世謂
之薄谿水汝水又東逕哀信縣故城北而東注矣
又東至原鹿縣

汝水又東南逕縣故城西杜預所釋地曰汝陰有
原鹿縣也

南入于淮

所謂汝口側水有汝口戍淮汝之交會也

水經第二十一



